


周髀算經

全

5
865



門二奴
第 86 分
卷





周髀算經序

周髀算經二卷古蓋天之學也以勾股之法度
天地之高厚推日月之運行而得其度數其書
出於商周之間自周公受之於商高周人志之
謂之周髀其所從來遠矣隋書經籍志有周髀
一卷趙嬰註周髀一卷甄鸞重述而唐之藝文
志天文類有趙嬰註周髀一卷甄鸞註周髀一
卷其曆算類仍有李淳風註周髀算經二卷本
此一書耳至於本朝崇文總目與夫中興館閣

書目皆有周髀算經二卷云趙君卿述甄鸞重述李淳風等註釋趙君卿名爽君卿其字也如是則在唐以前則有趙嬰之註而本朝以來則是趙爽之本所記不同意者趙嬰趙爽止是一人豈其字文相類轉寫之誤耶然亦當以隋唐之書爲正可也又崇文總目及李籍周髀音義皆云趙君卿不詳何代人今以序文考之有曰渾天有靈憲之文蓋天有周髀之法靈憲乃張衡之所作實後漢安順之世而甄鸞之重述者

乃是解釋君卿之所註出於宇文周之世以此推之則君卿者其亦魏晉之間人乎若夫乘勾股朱黃之實立倍差減并之術以盡開方之妙百世之下莫之可易則君卿者誠算學之宗師也嘉定六年癸酉十一月一日丁卯冬至承議郎權知汀州軍州兼管內勸農事主管坑冶括蒼鮑澣之仲祺謹書

周髀算經序

夫高而大者莫大於天厚而廣者莫廣於地體
恢洪而廓落形修廣而幽清可以玄象課其進
退然而宏達不可指掌也可以晷儀驗其長短
然其巨闊不可度量也雖窮神知化不能極其
妙探曠索隱不能盡其微是以詭異之說出則
兩端之理生遂有渾天蓋天兼而並之故能彌
綸天地之道有以見天地之曠則渾天有靈憲
之文蓋天有周髀之法累代存之官司是掌所

以欽若昊天恭授民時爽以暗蔽才學淺昧鄰
高山之仰止慕景行之軌轍負薪餘日聊觀周
髀其旨約而遠其言曲而中將恐廢替濡滯不
通使談天者無所取則輒依經爲圖誠冀頽毀
重仞之墻披露堂室之奧庶博物君子時迴思
焉

周髀題辭

始讀周髀輒駭其艱怪及再一尋討不過乘方
圓參兩以生勾股遂至于算數所不可及蓋亦
因天地自然之數耳故其書稱榮方學于陳子
至畢思驚神卒無所用其智乃知謂天蓋高固
可坐而定者不誣也然周髀率以表影一寸度
爲千里按李淳風所引宋元嘉十九年測影于
交州夏至日影在表南三寸二分共得一尺八
寸二分洛去交一萬一千里是不足及六百里一

寸也觀此則日徑千二百五十里去地八萬里
之說又有不可盡據者故蔡邕謂周髀術數具
存驗天多所違失又云周髀者即蓋天之說也
是以王任仲據蓋天之說以駁渾儀爲桓君山
所屈則周髀之術可睹矣又淳風別引宋書歷
志二十四表影與今宋書相較則互有不同近
刻宋書爲友人姚叔祥所校稱善本因舉此段
問之叔祥云于時政以不得周髀故貽足下今
日之問耳併識于此以俟刊定繡水沈士龍題

周髀以周人志之乃稱周髀而虞喜則謂天之
體轉四方地體卑不動天周其上故云周其解
周字又一義也然周髀之說奪于渾天如楊子
雲八難卒無有能破之者惟梁武帝于長春殿
講義別擬天體全同周髀以排渾天之論其後
遂不復顯凡以世乏善算遂令真秘湮屈余讀
魏書有僊人成公興傭賃寇謙之家爲其開舍
南辣田謙之坐樹下算興時來看後謙之算七
曜有所不了惘然自失興曰先生何爲不憚謙

之曰我學算累年而近算周髀不合以此自媿
且非汝所知何勞問也興曰先生試隨興語布
之俄然便決謙之歎伏不測請師事之興後入
嵩山石室尸解乃知周髀非僊真有道算難遽
合彼桓鄭蔡陸者恐未易以聲附子雲也武原
胡震亨題

周髀題辭

周髀音義

假承務郎秘書省鈞考算經文字臣李籍撰

序

周髀

步米切周髀算經者以九數勾股重差算

推步蓋天之法也髀者股也以表為股周天曆
度本包儀氏立法其傳自周公受之於大夫商
高周人志之

故曰周髀

趙君卿撰

雖免切述也君卿趙恢

廓落

上枯郭切下歷各切曷儀居洧切度量上達

大也

隱

上色白切下於謹切隱者隱匿詭異上居委



冀切詭也。渾天，胡昆切。渾天者，言天地之體譬如
論怪也。渾天，鳥卯天包地外，猶殼之裹黃也。周
旋無端，其形渾渾然，故曰渾天。史官候臺所用
銅儀，則其法也。立八尺圓體，具天地之形，以正
黃道。古察發欽以行日月，以步五緯，精微深
妙，不代百易之道也。官有其器而無其書。
蓋天，居大切。蓋天之說，即周髀是也。其言天似蓋
天，笠地似覆，繫天地各中高外下。北極之下，為
天地之中，其地最高，而滂沱四隕，三光隱映，以
為晝夜。天中高於外，衡冬至日之所在，六萬里
北極下地二萬里。天地隆高相從，日去地常八
萬里。日麗天而平轉，分冬夏之間，日前行道為
七衡六間。每衡周徑里數各依算術，用勾股重
差推晷影極游，以為遠近之數，皆得於表股者
也。故曰周髀。又周髀家云：天圓如張蓋，地方如
棋局。天旁轉如推磨，而左行日月右行。隨天左
轉，故日月實東行，而天牽之以西。沒譬之於蟻
行磨石之上，磨左旋而蟻右去，磨疾而蟻遲，故

不得，不隨磨以左迴焉。天形南高而北下，日出
高，故見日入下，故不見天。天之形如倚蓋，故極在
人北，是其證也。極在天之中，而今靈憲，詐建切
在人北，所以知天之形如倚蓋也。靈憲，詐建切
衡所述其說。重仞，上直龍切。下音，與於到切。迴，戶
主於渾天。重仞，上直龍切。下音，與於到切。迴，戶
切。遠也。

卷上

甄鸞，上之人切。下歷官切。重述，上直龍切。下時

注釋甄鸞又從而善數，色具切。包犧，上蒲交切。下

發，明故曰重述。善數，數算也。包犧，下虛宜切。

曆度，徒箇切。而度，大各切。量也。

勾股圓方圖，勾古侯切。股公土切。圓徑一而周
三方，徑一而匝四，伸圓之周而為

勾展方之匝而為股共結一角邪適五乃圓

方邪徑相通之率也勾股圓方圖蓋以此設學

者觀之思弦結胡田切共率與也又音律奇耦居

過半矣

宜切下矩俱雨折之列更相下息半切共盤上

鳥口切切昏墊都念切下也書并切卑政勾股之差

用切下楚佳切不齊也勾股之差量均切力仗為豪切莫候

其數差一謂勾三股四也

也偃矩覆矩表也仰表所以望高俯表所以測

深方屬地殊玉切滂施下唐何切四隤徒回列

星之宿禮記月令宿離不惑是也

不省言不寤也猶言不敏也累思魯水累重也直能才單德

猶言不敏也

切單馳思慮也捕影索也掩日衣檢切表

間古閑隆殺所介薄地迫也姜芟晉人也交

趾音止郡名也去洛路迂雲俱切穎川庾頊切

祖冲之持中切冲之宋南徐州秣陵音未信都

芳並如字善算者虞劄苦郭切梁

日高圖並如字日高圖者求日高之法也求日

表相去二千里為廣廣袤相乘得一億六千萬

里為黃甲之實以影差二寸為二千里為法除

之得黃乙之袤入萬里即黃甲古狎切王城黃

上與日齊此設圖之意也

乙億栗切日底地青丙補永切上青戊莫候切

上至日名曰乙

乙上至日名曰乙

青極者竭憶切諸言極者斤天奄衣檢切九隩息救切

於到切土靡地無母被切斥昌石切緣宿二息救切

宿也蝕乘力切如蠹食草木之葉也適至施直切發

也力冉切發音璇逮音迨有奇居宜切餘

也易曰歸冬至夏至觀律之數聽鍾之音律呂

聽而聽鐘音之清濁也晉律曆志曰陰陽和

則景至律氣應則灰除是故天子常以冬夏至

日御前殿合入能之士陳入音聽樂均度晷影

候鍾律權土炭效陰陽冬至陽氣應則灰除是

故樂均清影長極黃鍾通土炭輕而衡仰夏至

陰氣應則樂均濁影短極蕤賓通土炭重而衡

低進退於先後五日之中八能各以候狀聞太

史令封上效則和否則占

七衡圖何庚切七衡者七規也謂規為衡者取

衡徑二十三萬八千里次二衡徑二十七萬七

千六百六十六里二百步次三衡徑三十一萬

七千三百三十三里一百步次四衡徑三十五

萬七千里次五衡徑三十九萬六千六百六十

六里二百步次六衡徑四十三萬六千三百三

十三里一百步次七衡徑四十七萬六千里即

其徑而三之則各得其周也凡日月運行之圖

周七衡周而六間一衡之間萬九千八百三十

三里一百步以六衡乘之即夏青圖畫者胡卦

也俗合際上胡閭切常處昌據切躔呈延切卯

酉上莫飽切下以久切皆辰牽牛上輕烟切下

名也卯正東也酉正西也

如字牽牛北

方宿也冬至
日在牽牛
也夏至日
在東井

婁 盧侯切婁西方宿
也春分日在婁
東井 子郢切
南方宿

角 記岳切東方宿
也秋分日在角
用繒 慈陵切
帛也

呂氏 兩舉切呂氏者呂氏春秋也
呂不韋為秦相國
集當世儒士使著所聞為十二紀八覽六論合

十餘萬言備古今之
四海 呼改切呂氏春秋曰
事名為呂氏春秋
凡四海之內東西二

萬八千里南北二萬六千里爾雅云九夷八狄
七戎六蠻謂之四海言東西南北之數者將

車轍馬跡之所至河圖括地象亦云里數而有
君長之州九阻中國之文德及而不治又云八

極之廣東西二億二萬三千五百里南北二億
三萬三千五百里淮南子地形訓云禹使大章

步自東極至于西極孺亥步
河圖括地象 括音
自北極至南極而數皆然

圖括地象
緯書名也
淮南子 並如字漢淮南王安所著之書也
大章 音泰
人名

六間 古閑切兩衡
相去之間也
粗通 徂五切
略也
放此 南兩切效
也下同

卷下

四和 戶戈切調也四和者謂之極子午卯酉得
風雨之所會陰陽之中天地之所合四時之所交

百物阜安草木蕃庶故曰四和
阜安 房缶切
盛也

蕃 符袁切
茂也
易處 夷益切
交也
蓋笠 上居大切
下音立

障蔽 上之亮切隔也
下必袂切奄也
日兆 六切下
離地力智切

月 直紹切日者陽之精譬猶火光月者陰之精
譬猶水光月含影故月光生於日之所照魄

生於日之所蔽當日則光盈就日則明魄
盡月稟日光而成形兆故云日兆月也

之明消也康誥曰惟三月哉生魄孔安國曰三
月始生魄月十六日明消而魄生楊子曰既望

則終魄於東亦此意也行列胡剛極樞春朱切爾雅曰樞謂之棖郭璞云門

戶扉樞也此言極樞者取繩繫古詩切表顛年

其居中而臨制四方也漏晝夜百刻晷漏中星畧例

也中折之列切漏晝夜百刻晷漏中星畧例

曰日行有南北晷漏有長短然二十四氣晷差

遲疾不同勾股使然也直規中則差遲與勾股

數齊則差急隨辰極高下所遇不同如黃道刻

漏此乃數之淺者近代且猶未曉今推黃道去

極與晷影漏刻昏距中星四術反覆相揆度上

求消息同率施相為中以合九股之變揆度上

癸切下釋施隻切朝生旦也暮獲胡麥穫胡

大各切釋散也朝生旦也暮獲胡麥穫胡

也葶藶上音亭薺麥在禮正勾上音政無令

也葶藶下音歷薺麥在禮正勾下音鈞無令

使離呈切纖微思廉切督音篤分度徒固切經緯

上堅丁切下于貴切圓定正政則復扶富切須

南北為經東西為緯圓定正政則復扶富切須

女如字星游儀如字游儀所以望星也真觀中

連結玉衡游筭而貫約規矩又元樞北立北辰

南距地軸旁轉於內玉衡在元樞之間而南北

游仰以觀天之辰宿下以識器之晷度開元九

年率府兵曹參軍梁令瓚以木為游儀一行是

之乃奏黃道游儀古有其術而無其器昔人潛

思未能得今令瓚所為日道月交皆自然契合

於推步尤要請旨更車輻方六切所以實論而

鑄以銅十年儀成車輻奏轂者也以圓度為

輻為轂古祿切所以受輻也二十八宿息救副

置敷救切別也別地協檄頰切相應於證叅正

置敷算也下同地協檄頰切相應於證叅正

上倉含切八節並如字二至者寒暑之極二分

下音正八節者陰陽之和四立者生長收藏

司甲上

之始是為八節二十四氣並如字一歲凡八節節三氣

氣損益九寸九分六分分之一也並如字損者減

分然後減之益者加也加也冬至並如字至極也

以分然後減之益者加也冬至並如字至極也

極啓蟄存身也左氏傳曰啓蟄而郊春分文

切分之言中也春分芒種上莫郎切處暑昌

陽之中秋分爲陰之中芒種下之用切處暑據

也時舍音捨不虛誕音但一概古代矛楯上

浮切下食閏切矛所以勾楯所以蔽器不後天

同不相爲用凡言矛楯者况其所趣異也後天

並如字月後天者月東行者也此見日月與天

俱西南游一日一夜天一周而月在昨夜之東

故曰故舍式夜切舍謂二積後天資昔切以月

後天故舍十八宿之舍也積後天後天分看小

歲積分則積大歲徒蓋切大歲者十經歲堅丁

後天分也常也經歲者通十小月並如字小月者二

二月十九分之七小月十九日爲一月大月

徒蓋切大月者經月堅丁切經月者以十九

三十日爲一月經月乘周天分則經月之積合

朔上易閏切覆九敷救切當音正南方政音

十六頭並如字考靈曜曰分周天爲三十六頭

寅行二十四頭入於戌行十二頭短日分於

辰行十二頭入於申行二十頭北之謂也坎

苦感切正北巽蘇困切東南坤苦混切西南離

方之卦也乾渠焉切西北艮古恨切東北章

止良切條也十九歲爲一章節薄口切節之言

也而又衆殘齊合羣數畢滿故謂遂徐醉切遂者終也言
之節四章爲一節凡七十六歲也
五行之德一終盡極日月辰終也始九切始
二十節爲一遂凡千五百二十歲也
五星終而復始也三遂爲一極如字終也言日
首凡四千五百六十歲也
朔寒暑推移萬物生育終而復始故謂之極極
七首爲一極凡三萬一千九百二十歲也
鑿度徒固切乾鑿度易緯書也

周髀音義

終

附算學源流

晉書律曆志黃帝紀三綱而闡書契乃使羲龢
常儀占月車區占星氣伶倫造律呂大撓造甲
子隸首作算數容成總斯六術攷定氣象建行
察發飲起消息正閏餘述而著焉謂之調歷
漢書律曆志一曰律數二曰和聲三曰審度四
曰嘉五曰權衡
數者一十百千萬也所以算數事物順性命
之理也其算法用竹徑一分長六寸二百七

十一枚而成六觚爲一握度長短者不失毫釐量多少者不失圭撮權輕重者不失黍參紀於一協於十長於百大於千衍於萬其法在算術乎

附算法歌訣

開平方法少人通起手先呼九數重百與萬同并百萬二三隔位一相從千同十萬和千萬三四連身九九終除盡虛加一倍回還折半復原宗

周髀算經卷上

漢

趙

君卿

注

北周漢中郡守前司隸臣甄鸞重述

唐朝議大夫行太史令上輕車都尉臣李淳風等奉勅注釋

明

毛

晉

校

昔者周公問於商高曰竊聞乎大夫善數也

唐寅

曰經文也

周公姓姬名旦武王之弟商高周時賢大夫善算者也周公位居家宰德則至高尚自卑



已以自牧下學而上達況其凡乎

唐寅曰此趙注也

請問古者包犧立周天曆度

包犧三皇之一始畫八卦以商高善數能通乎微妙達乎無方無大不綜無幽不顯聞包犧立周天曆度運章部之法易曰古者包犧氏之王天下也仰則觀象於天俯則觀法於地此之謂也

夫天不可階而升地不可將尺寸而度

邈乎懸廣無階可升蕩乎遐遠無度可量

請問數從安出

心昧其機請問其目

商高曰數之法出於圓方

圓徑一而周三方徑一而匝四伸圓之周而為勾展方之匝而為股共結一角邪適弦五政圓方邪徑相通之率故曰數之法出於圓方圓方者天地之形陰陽之數然則周公之所問天地也是以商高陳圓方之形以見其象因竒耦之數以制其法所謂言約旨遠微

妙幽通矣

圓出於方方出於矩

圓規之數理之以方方周匝也方正之物出之以矩矩廣長也

矩出於九九八十一

推圓方之率通廣長之數當須乘除以計之九九者乘除之原也

故折矩

故者申事之辭也將爲勾股之率故曰折矩

也

以爲勾廣三

廣圓之周橫者謂之廣勾亦廣廣短也

股修四

應方之匝從者謂之修股亦修修長也

徑隅五

自然相應之率徑直隅角也亦謂之弦

既方之外半其一矩

勾股之法先知二數然後推一見勾股然後

求弦先各自乘成其實實成勢化外乃變通
故曰既方其外或并勾股之實以求弦實之
中乃求勾股之分并實不正等更相取與互
有所得故曰半其一矩其術勾股各自乘三
三如九四四一十六并爲弦自乘之實二十
五減勾於弦爲股之實一十六減股於弦爲
勾之實九
環而共盤得成三四五

盤讀如盤桓之盤言取而并減之積環屈而
共盤之謂開方除之其一面故曰得成三四
五也

兩矩共長二十有五是謂積矩


兩矩者勾股各自乘之實共長者并實之數
將以施於萬事而此先陳其率也

故禹之所以治天下者此數之所生也

禹治洪水決流江河望山川之形定高下之
勢除滔天之災釋昏墊之厄使東注於海而
無浸溺乃勾股之所由生也


勾股圓方圖 弦實二十五朱及黃

圖 弦



朱實六黃實一

圖 右




勾實九青

股實之矩十六黃

股實十六黃

左圖



勾實之矩九青

勾股方圓圖注

趙君卿曰勾股各自乘併之為弦實開方除之即弦也案弦圖又可以勾股相乘為朱實二倍之為朱實四以勾股之差自相乘為中黃實加差實亦成弦實以差實減弦實半其餘以差為從法開方除之復得勾矣加差於勾即股凡并勾股之實即成弦實或矩於內或方於外形詭而量均體殊而數齊勾實之矩以股弦差為廣股弦并為袤而股實方其

尺骨算經卷上
裏減矩勾之實於弦實開其餘即股倍股在
兩邊爲從法開矩勾之角即股弦差加股爲
弦以差除勾實得股弦并以并除勾實亦得
股弦差令并自乘與勾實爲實倍并爲法所
得亦弦勾實減并自乘如法爲股股實之矩
以勾股差爲廣勾弦并爲袤而勾實方其裏
減矩股之實於弦實開其餘即勾倍勾在兩
邊爲從法開矩股之角即勾弦差加勾爲弦
以差除股實得勾弦并以并除股實得勾弦

差令并自乘與股實爲實倍并爲法所得亦
弦股實減并自乘如法爲勾兩差相乘倍而
開之所得以股弦差增之爲勾以勾弦差增
之爲股兩差增之爲弦倍弦實列勾股差實
見弦實者以圖考之倍弦實滿外大方而多
黃實黃實之多即勾股差實以差實減之開
其餘得外大方大方之面即勾股并也令并
自乘倍弦實乃減之開其餘得中黃方黃方
之面即勾股差以差減并而半之爲勾加差

於并而半之為股其倍弦為廣衰合令勾股
 見者自乘為其實四實以減之開其餘所得
 為差以差減合半其餘為廣減廣於弦即所
 求也觀其迭相規矩共為反覆互與通分各
 有所得然則統叙羣倫弘紀眾理貫幽入微
 鈎深致遠故曰其裁制萬物唯所為之也

釋圓方勾股注

按君卿注曰勾股各自乘并之為弦實開
 方除之即弦

臣鸞曰假令勾三自乘得九股四自乘得
 十六并之得二十五開方除之得五為弦
 也寅曰五五二十五
 弦實四面之一也

注云按弦圖又可以勾股相乘為朱實二
 倍之為朱實四以勾股之差自相乘為中

黃實寅曰勾股相乘
 其數一十二也

臣鸞曰以勾弦差二倍之為四自乘得一
 十六為左圖中黃實也寅曰甄氏止注以
 勾股十二字之義

臣淳風等謹按注云以勾股之差自乘為

中黃實鸞云倍勾弦差自乘者苟求異端

雖合其數於率不通寅曰勾股之差其數一也自乘得一一如

注云加差實亦成弦實

臣鸞曰加差實一并外矩青八得九并中

黃十六得二十五亦成弦實也

臣淳風等謹按注云加差實一亦成弦實

鸞曰加差實并外矩及中黃者雖合其數

於率不通寅曰加差實之一於前文所言朱實四之上朱實之四為二十

四加一為弦實二十五也

注云以差實減弦實半其餘以差為從法開方除之復得勾矣

臣鸞曰以差實九減弦實二十五餘十六半之得八以差一加之得九開之得勾三也

也

臣淳風等謹按注宜云以差實一減弦實

二十五餘二十四半之為十二以差一從

開方除之得勾三鸞云以差實九減弦實

者雖合其數於率不通

顧應祥曰以差實一減弦實二十五

注云加差於勾即股

臣鸞曰加差一於勾三得股四也

注云凡并勾股之實即成弦實

臣鸞曰勾實九股實十六并之得二十五

也

注云或矩於內或方於外形詭而量均體

殊而數齊勾實之矩以股弦差為廣股弦

并為袤

臣鸞曰以股弦差一為廣股四并弦五得

九為袤左圖外青也

注云而股實方其裏

臣鸞曰為左圖中黃十六

注云減矩勾之實於弦實開其餘即股

臣鸞曰減矩勾之實九于弦實二十五餘

一十六開之得四股也

注云倍股在兩邊為從法開矩勾之角即

股弦差

臣鸞曰倍股四得八在圖兩邊以為從法開矩勾之角九得一也

注云加股為弦

臣鸞曰加差一於股四則弦五也

注云以差除勾實得股弦并

臣鸞曰以差一除勾實九得九即股四弦五并為九也

注云以并除勾實亦得股弦差

臣鸞曰以九除勾實九得股弦差一

注云令并自乘與勾實為實

臣鸞曰令并股弦得九自乘為八十一又與勾實九加之得九十為實

注云倍并為法

臣鸞曰倍股弦并九得十八者為法

注云所得亦弦

臣鸞曰除之得五為弦

寅曰以法十八除實九十

注云勾實減并自乘如法為股

臣鸞曰以勾實九減并自乘八十一餘七

十二以法十八除之得四為股也

注云股實之矩以勾弦差為廣勾弦并為
袤

臣鸞曰股實之矩以勾弦差二為廣勾弦
并八為袤

注云而勾實方其裏減矩股之實于弦實
開其餘即勾

臣鸞曰勾實有九方在右圖裏以減矩股
之實十六於弦實二十五餘九開之得三

勾也

注云陪勾在兩邊

臣鸞曰各三也 寅曰倍之得六

注云為從法開矩股之角即勾弦差加勾
為弦

臣鸞曰加差二於勾三則弦五也

注云以差除股實得勾弦并

臣鸞曰以差二除股實十六得八勾三弦
五并為八也

注云以并除股實亦得勾弦差

臣鸞曰以并除股實十六得勾弦差二

注云令并自乘與股實為實

臣鸞曰令并八自乘得六十四與股實十

六加之得八十為實

注云倍并為法

臣鸞曰倍勾弦并八得十六為法

注云所得亦弦

臣鸞曰除之得弦五也

注云股實減并自乘如法為勾

臣鸞曰以股實十六減并自乘六十四餘

四十八以法十六除之得三為勾也

注云兩差相乘倍而開之所得以股弦差

增之為勾

臣鸞曰以股弦差一乘勾弦差二得二倍

之為四開之得二以股弦差一增之得三

勾也

注云以勾弦差增之為股

臣鸞曰以弦差二增之得四股也

注云兩差增之為弦

臣鸞曰以股弦差一勾弦差二增之得五弦也

注云倍弦實列勾股差實見弦實者以圖考之倍弦實滿外大方而多黃實黃實之多即勾股差實

臣鸞曰倍弦實二十五得五十滿外大方七七四十九而多黃實黃實之多即勾股

差實也

注云以差實減之開其餘得外大方大方之面即勾股并

臣鸞曰以差實一減五十餘四十九開之即大方之面七也亦是勾股并也

注云令并自乘倍弦實乃減之開其餘得中黃方黃方之面即勾股差

臣鸞曰并七自乘得四十九倍弦實二十五得五十以減之餘即中黃方差實一也

周髀算經卷上
故開之卽勾股差一也

注云以差減并而半之爲勾

臣鸞曰以差一減并七餘六半之得三勾也

注云加差於并而半之爲股

臣鸞曰以差一加并七得八而半之得四股也

注云其倍弦爲廣衰合

臣鸞曰倍弦二十五爲五十爲廣衰合

臣淳風等謹按列廣衰術宜云倍弦五得十爲廣衰合今鸞云倍弦二十五者錯也

寅曰勾廣一衰九股廣二衰八

注云而今勾股見者自乘爲其實四實以減之開其餘所得爲差

臣鸞曰今自乘者以七七自乘得四十九四實大方勾股之中有四方一方之中有方十二四實有四十八減上四十九餘一也開之得一卽勾股差一

臣淳風等謹按注意令自乘者十自乘得
一百四實者大方廣袤之中有四方若據
勾實而言一方之中有實九四實有三十
六減上一百餘六十四開之得八即廣袤
差此是股弦差減股弦并餘數若據股實
而言之一方之中有實十六四實有六十
四減上一百餘三十六開之得六即廣袤
差此是勾股差減勾弦并餘數也鸞云令
自乘者以七七自乘得四十九四實者大

方勾股之中有四方一方之中有方十二
四實者四十八減上四十九餘一也開之
得一即勾股差一者錯也寅曰大方之中
有四弦實故四
其勾實得三十六減之餘六十四開其餘
得八為勾之廣袤差四其股實得六十四
減之餘三十六開得六為股之廣袤差所
謂廣袤差者勾廣一而袤九股廣二而袤
八廣袤相
減之餘也

注云以差減合半其餘為廣

臣鸞曰以差一減合七餘六半之得三廣
也

臣淳風等謹按注意以差八六各減合十
 餘二四半之得一二一卽股弦差二卽勾
 弦差以差減弦卽各衰廣也鸞云以差一
 減合七餘六半之得三廣者錯也寅曰以
 勾之廣
衰差入減廣衰合十餘二半之為勾之廣
 以股衰差六減廣衰合十餘四半之為股
 之廣二注
 皆未瑩

注云減廣於弦卽所求也

臣鸞曰以廣三減弦五卽所求差二也

臣淳風等謹按注意以廣一二各減弦五

卽所求股四勾三也鸞云以廣三減弦五

卽所求差二者此錯也寅曰甄鸞
 述說終此

周公曰大哉言數唐寅曰此
 經文也

心達數術之意故發大哉之數唐寅曰此
 趙注也

請問用矩之道

謂用表之宜測望之法

商高曰平矩以正繩

以求繩之正定平懸之體將欲慎毫釐之差
 防千里之失

偃矩以望高覆矩以測深臥矩以知遠

言施用無方曲從其事術在九章

環矩以為圓合矩以為方

既以追尋情理又可造製圓方言矩之於物

無所不至

方屬地圓屬天天圓地方

物有圓方數有奇耦天動為圓其數奇地靜

為方其數耦此配陰陽之義非實天地之體

也天不可窮而見地不可盡而觀豈能定其

圓方乎又曰北極之下高人所居六萬里滂

沲四隕而下天之中央亦高四旁六萬里是

為形狀同歸而不殊塗隆高齊耽而易以陳

故曰天似蓋笠地法覆槃

方數為典以方出圓

夫體方則度影正形圓則審實難蓋方者有

常而圓者多變故當制法而理之理之法者

半周半徑相乘則得方矣又可周徑相乘四

而一又可徑自乘三之四而一又可周自乘

十二而一故圓出於方典實也

笠以寫天

笠亦如蓋其形正圓戴之所以象天寫猶象也言笠之體象天之形詩云何蓑何笠此之義也

天青黑地黃赤天數之為笠也青黑為表丹黃為裏以象天地之位

既象其形又法其位言相方類不亦似乎是故知地者智知天者聖

言天之高大地之廣遠自非聖智其孰能與於此乎

智出於勾

勾亦影也察勾之損益加物之高遠故曰智出於勾

勾出於矩

矩謂之表表不移亦為勾為勾將正故曰勾出於矩焉

夫矩之於數其裁制萬物唯所為耳

言包含幾微轉通旋環也

周公曰善哉

善哉言明曉之意所謂問一事而萬事達

昔者榮方問於陳子

榮方陳子是周公之後人非周髀之本文然此二人共相解釋後之學者謂之章句因從其類列於事下又欲尊而遠之故云昔者時世官號未之前聞

曰今者竊聞夫子之道

榮方問陳子能述商高之旨明周公之道

知日之高大

日去地與圓徑之術

光之所照

日旁照之所及也

一日所行

日行天之度也

遠近之數

冬至夏至去人之遠近也

人所望見

人目之所極也

四極之窮

日光之所遠也

列星之宿

二十八宿之度也

天地之廣袤

袤長也東西南北謂之廣長

夫子之道皆能知之其信有之乎

而明察之故不昧不疑

陳子曰然

言可知也

榮方曰方雖不省願夫子幸而說之

欲以不省之情而觀大雅之法

今若方者可教此道邪

不能自料訪之賢者

陳子曰然

言可教也

此皆算術之所及

言周髀之法出於算術之妙也

子之於算足以知此矣若誠累思之

累重也言若誠能重累思之則達至微之理
於是榮方歸而思之數日不能得

雖潛心馳思而才單智竭

復見陳子曰方思之不能得敢請問之陳子曰
思之未熟

熟猶善也

此亦望遠起高之術而子不能得則子之於數
未能通類

定高遠者立兩表望懸邈者施累矩言未能
通類求勾股之意

是智有所不及而神有所窮

言不能通類是情智有所不及而神思有所
窮滯

夫道術言約而用博者智類之明

夫道術聖人之所以極深而研幾唯深也故

能通天下之志唯幾也故能成天下之務是
以其言約其旨遠故曰智類之明也

問一類而萬事達者謂之知道

引而伸之觸類而長之天下之能事畢矣故
謂之知道也

今子所學

欲知天地之數

算數之術是用智矣而尚有所難是子之智類

單

算術所包尚以為難是子智類單盡

夫道術所以難通者既學矣患其不博

不能廣博

既博矣患其不習

不能究習

既習矣患其不能知

不能知類

故同術相學

術教同者則當學通類之意

居業錄卷一
三十一
同事相觀

事類同者觀其旨趣之類

此列士之愚智

列猶別也言視其術鑒其學則愚智者別矣
賢不肖之所分

賢者達於事物之理不肖者闇於照察之情
至於後神馳思聰明殊別矣

是故能類以合類此賢者業精習智之質也

學其倫類觀其指歸唯賢智精習者能之也

夫學同業而不能入神者此不肖無智而業不
能精習

俱學道術明不察不能以類合類而長之此
心遊目蕩義不入神也

是故算不能精習吾豈以道隱子哉固復熟思
之

凡教之道不憤不啓不悱不發憤而悱之然
後啓發既不精思又不學習故言吾無隱也
爾固復熟思之舉一隅使及之以三也

周髀算經卷上
三十四
榮方復歸思之數日不能得復見陳子曰方思之以精熟矣智有所不及而神有所窮知不能得願終請說之

自知不敏避席而請說之

陳子曰復坐吾語汝於是榮方復坐而請陳子說之曰夏至南萬六千里冬至南十三萬五千里日中立竿測影

臣鸞曰南戴日下立八尺表表影千里而差一寸是則天上一寸不下千里今夏至

影有一尺六寸故其萬六千里冬至影一丈三尺五寸則知其十三萬五千里

此一者天道之數

言天道數一悉以如此

周髀長八尺夏至之日晷一尺六寸

晷影也此數望之從周城之南千里也而周官測影尺有六寸蓋出周城南千里也記云神州之土方五千里雖差一寸不出畿地之分先王知之實故建王國

唐書卷一百一十五
日
髀者股也正晷者勾也

以髀爲股以影爲勾股定然後可以度日之高遠正晷者日中之時節也

正南千里勾一尺五寸正北千里勾一尺七寸候其影使表相去二千里影差二寸將求日之高遠故先見其表影之率

日益表南晷日益長候勾六尺候其影使長六尺者欲令勾股相應勾三股四弦五勾六股八弦十

日
卽取竹空徑一寸長八尺捕影而視之空正掩

以徑寸之空視日之影髀長則大矩短則小正滿八尺也捕猶索也掩猶覆也而日應空之孔


掩若重規更言八尺者舉其定也又曰近則大遠則小以影六尺爲正

由此觀之率八十寸而得徑一寸以此爲日髀之率

故以勾為首以髀為股

首猶始也股猶末也勾能制物之率股能制
勾之正欲以為總見之數立精理之本明可
以周萬事智可以達無方所謂智出於勾勾
出於矩也

從髀至日下六萬里而髀無影從此以上至日
則八萬里



表端臣鸞曰求從髀至日下六萬
里者先置南表晷六尺上十

之為六十寸以兩表相去二千里乘得十
二萬里為實以影差二寸為法除之得日
底地去表六萬里求從髀至日八萬里者
先置表高八尺上十之為八十寸以兩表
相去二千里乘之得十六萬為實以影差
二寸為法除之得從表端上至日八萬里
也

若求邪至日者以日下為勾日高為股勾股各
自乘并而開方除之得邪至日從髀所旁至日

所十萬里

旁此古邪字求其數之術曰以表南至日下六萬里爲勾以日高八萬里爲股爲之求弦勾股各自乘并而開方除之即邪至日之所也

臣鸞曰求從髀邪至日所法先置南至日底六萬里爲勾重張自乘得三十六億爲勾實更置日高八萬里爲股重張自乘得六十四億爲股實并勾股實得一百億爲

弦實開方除之得從王城至日十萬里今有十萬里問徑幾何曰一千二百五十里八十寸而得徑一寸以一寸乘十萬里爲實八十寸爲法即得

以率率之八十里得徑一里十萬里得徑千二百五十里

法當以空徑爲勾率竹長爲股率日去人爲大股大股之勾即日徑也其術以勾率乘大股股率而一此以八十里爲法十萬里爲實

實如法而一即得日徑

故日日晷徑千二百五十里

臣鸞曰求以率八十里得徑一里十萬里得徑千二百五十里法先置竹孔徑一寸爲十里爲勾更置邪去日十萬里爲股以勾十里乘股十萬里得一億爲實更置日去地八萬里爲法除實得日晷徑千二百五十里故云日晷徑也

臣淳風等謹按夏至王城望日立兩表相

去二千里表高八尺影去前表一尺五寸去後表一尺七寸舊術以前後影差二寸爲法以前影寸數乘表間爲實實如法得萬五千里爲日下去南表里又以表高八十寸乘表間爲實實如法得八萬里爲表上去日里仍以表寸爲日高影寸爲日下待日漸高候日影六尺用之爲勾以表爲股爲之求弦得十萬里爲邪表數目取管圓孔徑一寸長八尺望日滿筒以爲率長

八尺骨集經卷上
三十
八十寸爲一邪去日十萬里日徑即千二百五十里以理推之法云天之處心高於外衡六萬里者此乃語與術違勾六尺股八尺弦十尺角隅正方自然之數蓋依繩水之定施之於表矩然則天無別體用日以爲高下術旣隨乎而遷高下從何而出語術相違是爲大失又按二表下地依水平法定其高下若北表地高則以爲勾以間爲弦置其高數其影乘之其表除之所

得益股爲定間若北表下者亦置所下以法乘除所得以減股爲定間又以高下之數與間相約爲地高遠之率求遠者影乘定間差法而一所得加表日之高也求邪去地者弦乘定間差法而一所得加弦日邪去地此三等至皆以日爲正求日下地高下者置戴日之遠近地高下率乘之如間率而一所得爲日下地高下形勢隆殺與表間同可依此率若形勢不等非代所

知率日徑求日大小者徑率乘間如法而
一得日徑此徑當即得不待影長六尺凡
度日者先須定二矩水平者影南北立勾
齊高四尺相去一丈以二弦候牽于勾上
并率二則擬爲候影勾上立表弦下望日
前一則上畔後一則下畔引則就影合與
表日參直二至前後三四日間影不移處
即是當以候表並望人取一影亦可日徑
影端表頭爲則然地有高下表望不同後

六術乃窮其實 第一後高前下術高爲
勾表間爲弦後復影爲所求率表爲有所
率以勾爲所有數所得益股爲定間 第
二後下術以其所下爲勾表間爲弦置其
所下以影乘表除所得減股餘爲定間
第三邪下術依其北高之率高其勾影合
與地勢隆殺相似餘同平法假令髀邪下
而南其邪亦同不須別望但弦短與勾股
不得相應其南里數亦隨地勢不得校乎

平則促若用此術但得南望若北望者即用勾照南下之術當北高之地 第四邪上術依其後下之率下其勾影此謂迴望北極以為高遠者望去取差亦同南望此術弦長亦與勾股不得相應唯得北望不得南望若南望者即用勾影北高之術

第五平術不論高下周髀度日用此平術故東西南北四望皆通遠近一差不須別術 第六術者是外衡其徑云四十七萬

六千里半之得二十三萬八千里者是外衡去天心之處心高於外衡六萬里為率南行二十三萬八千里下校六萬里約之得南行一百一十九里下校三十里一百一十九步差下三十步 三十步大強差下十步以此為准則不合有平地地既平而用術尤乖理驗且自古論晷影差變每有不同今略其梗槩取其推步之要尚書攷靈曜云日永影尺五寸日短一十三尺

日正南千里而減一寸張衡靈憲云懸天之晷薄地之儀皆移千里而差一寸鄭玄註周禮云凡日影於地千里而差一寸王蕃姜岌因此爲說按前諸說是數並同其言更出書非直有此以事考量恐非實矣謹按宋元嘉十九年歲在壬午遣使往交州度日影夏至之日影在表南三寸二分太康地理志交趾去洛陽一萬一千里陽城去洛陽一百八十里交趾西南望陽城


洛陽在其東南較而言之令陽城去交趾近於洛陽去交趾一百八十里則交趾去陽城一萬八百二十里而影差尺有八寸二分是六百里而影差一寸也况復入路迂迴牟腸曲折方於鳥道所較彌多以事驗之又未盈五百里而差一寸明矣千里之言固非實也何承天又云詔以土圭測影考校二至三日有餘從來積歲及交州所上驗其增減亦相符合此則影差之

周禮大司徒職曰夏至之影尺有五寸馬融以爲洛陽鄭玄以爲陽城尚書攷靈曜日永影一尺五寸鄭玄以爲陽城日短十三尺易緯通卦驗夏至影尺有四寸八分冬至一丈三尺劉向洪範傳夏至影一尺五寸八分是時漢都長安而向不言測影處所若在長安則非晷影之正也夏至影長一尺五寸八分冬至一丈三尺一寸四分向又云春秋分長七尺三寸六分

此即總是虛妄後漢曆志夏至影一尺五寸後漢洛陽冬至一丈三尺自梁天監已前並同此數魏景初夏至影一尺五寸魏初都許昌與潁川相近後都洛陽又在地中之數但易緯因漢曆舊影似不別影之冬至一丈三尺晉姜岌影一尺五寸宋都建康在江表驗影之數遙取陽城冬至一丈三尺宋大明祖冲之曆夏至影一尺五寸宋都秣陵遙取影同前冬至一丈三尺

後魏信都芳注周髀四術云按永平元年
戊子是梁天監之七年也見洛陽測影又
見公孫崇集諸朝士共觀祕書影同是夏
至之日以八尺之表測日中影皆長一尺
五寸八分雖無六尺近六寸梁武帝大同
十年太史令虞儼以九尺表於江左建康
測夏至日中影長一尺三寸二分以八尺
表測之影長一尺一寸七分強冬至一丈
三尺七分八尺表影長一丈一尺六寸二

分弱隋開皇元年冬至影長一丈二尺七
寸二分開皇二年夏至影一尺四寸八分
冬至長安測夏至洛陽測及王邵隋靈感
志冬至一丈二尺七寸二分長安測也開
皇四年夏至一尺四寸八分洛陽測也冬
至一丈二尺八寸八分洛陽測也大唐正
觀二年己丑五月二十三日癸亥夏至中
影一尺四寸六分長安測也十一月二十
九丙寅冬至中影一丈二尺六寸三分長



日高圖注

趙君卿曰黃甲與黃乙其實正等以表高乘
 兩表相去為黃甲之實以影差為黃甲之廣
 而一所得則變得黃甲之袤上與日齊按圖
 當加表高今言八萬里者從表以上復加之
 青丙與青已其實亦等黃甲與青丙相連黃
 乙與青已相連其實亦等皆以影差為廣
 臣鸞曰求日高法先置表高八尺為八萬
 里為袤以相兩表相去二千里為廣乘袤

八萬里得一億六千萬里爲黃甲之實以影差二寸爲二千里爲法除之得黃乙之袤八萬里卽上與日齊此言王城去天名曰甲日底地上至日名曰乙上天名青丙下地名青戊據影六尺王城上天南至日六萬里王城南至日底地亦六萬里是上下等數日夏至南萬六千里者立表八尺於王城影一尺六寸影寸千里故王城去夏至日底地萬六千里也

法曰周髀長八尺勾之損益寸千里

勾謂影也言懸天之影薄地之儀皆千里而差一寸

故曰極者天廣袤也

言極之遠近有定則天廣長可知

今立表高八尺以望極其勾一丈三寸由此觀之則從周北十萬三千里而至極下

謂冬至日加卯酉之時若春秋分之夜半極南兩旁與天中齊故以爲周去天中之數

榮方曰周髀者何陳子曰古時天子治周

古時天子謂周成王時以治周居王城故曰
昔先王之經邑奄觀九隩靡地不營土圭測
影不縮不盈當風雨之所交然後可以建王
城此之謂也

此數望之從周故曰周髀

言周都河南爲四方之中故以爲望主也

髀者表也

用其行事故曰髀由此捕望故曰表影爲勾

故曰勾股也

日夏至南萬六千里日冬至南十三萬五千里
日中無影以此觀之從南至夏至之日中十一
萬九千里

諸言極者斥天之中極去周十萬三千里亦
謂極與天中齊時更加南萬六千里是也
北至其夜半亦然

日極在極北正等也

凡徑二十三萬八千里

并南北之數也

此夏至日道之徑也

其徑者圓中之直者也

其周七十一萬四千里

周匝也謂天戴日行其數以三乘徑

臣鸞曰求夏至日道徑法列夏至日去天

中心十一萬九千里夏至夜一日亦去天

中心十一萬九千里并之得夏至日道徑

二十三萬八千里三乘徑得周七十一萬

四千里也

從夏至之日中至冬至之日中十一萬九千里

冬至日中去周十三萬五千里除夏至日中

去周一萬六千里是也

北至極下亦然則從極南至冬至之日中二十

三萬八千里從極北至其夜半亦然凡徑四十

七萬六千里此冬至日道徑也其周百四十二

萬八千里從春秋分之日中北至極下十七萬

八千五百里

春秋之日影七尺五寸五分加望極之勾一丈三寸

臣鸞曰求冬至日道徑法列夏至去冬至日中十一萬九千里從夏至日道北徑亦十一萬九千里併之得冬至日中北極下二十三萬八千里從極至夜半亦二十三萬八千里并之得冬至道徑四十七萬六千里以三乘徑即冬至日道周一百四十二萬八千里

從極下北至其夜半亦然凡徑三十五萬七千里周一百七萬一千里故日月之道常緣宿日道亦與宿正

內衡之南外衡之北圓而成規以為黃道二十八宿列焉日之行也一出入或表或裏五月二十三分月之二十一道一交謂之合朔交會及月蝕相去之數故曰緣宿也日行黃道以宿為正故曰宿正於中衡之數與黃道等

臣鸞曰求春秋分日道法列春秋分日中
 北至極下十七萬八千五百里從北極北
 至其夜半亦然并之得春秋分日道徑三
 十五萬七千里以三乘徑即日道周一百
 七萬一千里求黃道徑法列從北極南至
 夏至日中一十一萬九千里以從極北去
 冬至夜半二十三萬八千里并之得黃道
 三十五萬七千里從極南至冬至日北至
 夏至日夜半亦黃道徑也以三乘徑周得

一百七萬一千里也

南至夏至之日中北至冬至之夜半南至冬至
 之日中北至夏至之夜半亦徑三十五萬七千
 里周一百七萬一千里

此皆黃道之數與中衡等

春分之日夜分以至秋分之日夜分極下常有
 日光

春秋分者晝夜等春分至秋分日內近極故
 日光照及也

周髀算經卷上
五
秋分之日夜分以至春分之日夜分極下常無日光

秋分至春分日外遠極故日光照不及也

故春秋分之日夜分之時日所照適至極陰陽之分等也冬至夏至者日道發歛之所生也至晝夜長短之所極

發猶往也歛猶還也極終也

春秋分者陰陽之修晝夜之象

修長也言陰陽長短之等

晝者陽夜者陰

以明暗之差爲陰陽之象

春分以至秋分晝之象

北極下見日光也日永主物生故象晝也

秋分至春分夜之象

北極下不見日光也日短主物死故象夜也

故春秋分之日中光之所照北極下夜半日光之所照亦南至極此日夜分之時也故曰日照四旁各十六萬七千里

至極者謂璇璣之際爲陽絕陰障以日之時而日光有所不逮故知日旁照十六萬七千里不及天中一萬一千五百里也人望所見遠近宜如日光所照

日近我一十六萬七千里之內及我我自見日故爲日出日遠我十六萬七千里之外日則不見我我亦不見日故爲日入是爲日與目見於十六萬七千里之中故曰遠近宜如日光之所照也

從周所望見北過極六萬四千里

自此以下諸言減者皆置日光之所照若人目之所見十六萬七千里以除之此除極至周十萬三千里

臣鸞曰求從周所望見北過極六萬四千里法列人目所極十六萬七千里以王城周去極十萬三千里減之餘六萬四千里卽人望過極之數也

南過冬至之日三萬二千里

除冬至日中去周十三萬五千里

臣鸞曰求冬至日中三萬二千里法列人目所極十六萬七千里以冬至日中去王城十三萬五千里減之餘卽過冬至日中三萬二千里也

夏至之日中光南過冬至之日中光四萬八千里

除冬至之日中相去十一萬九千里

臣鸞曰求夏至日中光南過冬至日中光四萬八千里法列日高照十六萬七千里以冬夏至日中相去一十一萬九千里減之餘卽南過冬至之日中光四萬八千里南過人所望見一萬六千里

夏至日中去周萬六千里

臣鸞曰求夏至日中光南過人所望見萬六千里法列王城去夏至日中光南過人所望見萬六千里加日光所及十六萬七千里得十八萬三千里以人目所極十六

萬七千里減之餘卽南過人目所望見一萬六千里也

北過周十五萬一千里

除周夏至之日中一萬六千里

臣鸞曰求夏至日中光北過周十五萬一千里法列日光所及十六萬七千里以王城去夏至日中一萬六千里減之餘卽北過周十五萬一千里

北過極四萬八千里

除極去夏至之日十一萬九千里

臣鸞曰求夏至日中光北過極四萬八千里法列日光所及十六萬七千里以北極去夏至夜半十一萬九千里減之餘卽北過極四萬八千里也

冬至之夜半日光南不至人所見七千里

倍日光所照里數以減冬至日道徑四十七萬六千里又除冬至日中去周十三萬五千里

臣鸞曰求冬至夜半日光南不至人目所見七千里法列日光十六萬七千里倍之得三十三萬四千里以減冬至日道徑四十七萬六千里餘十四萬二千里復以冬至日中去周十三萬五千里減之餘即不至人目所見七千里

不至極下七萬一千里

從極至夜半除所照十六萬七千里

臣鸞曰求冬至日光不至極下七萬一千里法列冬至夜半去極二十三萬八千里以日光一十六萬七千里減之餘即不至極下七萬一千里

夏至之日中與夜半日光九萬六千里過極相接

接
倍日光所照以夏至日道徑減之餘即相接之數

臣鸞曰求夏至日中日光與夜半相接九萬六千里法列倍日光所照十六萬七千

里得徑三十三萬四千里以夏至日過徑
二十三萬八千里減之餘卽日光相接九
萬六千里也

冬至之日中與夜半日光不相及十四萬二千
里不至極下七萬一千里

倍日光所照以減冬至日道徑餘卽不相及
之數半之卽各不至極下

臣鸞曰求冬至日光與夜半日不及十四
萬二千里不至極下七萬一千里法列冬

至日道徑四十七萬六千里以倍日光所
照三十三萬四千里減之餘卽日光不相
及十四萬二千里半之卽不至極下七萬
一千里也

夏至之日正東西望直周東西日下至周五萬
九千五百九十八里半

求之術以夏至日道徑二十三萬八千里爲
弦倍極去周十萬三千里得二十萬六千里
爲股爲之求勾以股自乘減弦自乘其餘開

方除之得勾一十一萬九千一百九十七里
有奇半之各得周半數

臣鸞曰求夏至日正東西去周法列夏至
道徑二十三萬八千里爲弦自相乘得五
百六十六億四千四百萬爲弦實更置極
去周十萬三千里倍之爲二十萬六千里
爲股重張自相乘得四百二十四億三千
六百萬爲股實以減弦實餘一百四十二
億八百萬卽勾實以開方除之得正東西

去周一十一萬九千一百九十七里二十
三萬八千三百九十五分里之七萬五千
一百九十一半之卽周東西各五萬九千
五百九十八里半經曰奇者分也若求分
者倍分母得四十七萬六千七百九十卽
一方得五萬九千五百九十八里半四十
七萬六千七百九十分里之七萬五千一
百九十一本經無所餘算之次因而演之
也

冬至之日正東西方不見日

正東西方者周之卯酉日在十六萬七千里之外不見日

以算求之日下至周二十一萬四千五百五十七里半

求之術以冬至日道徑四十七萬六千里爲弦倍極之去周十萬三千里得二十萬六千里爲勾爲之求股勾自乘減弦之自乘其餘開方除之得四十二萬九千一百一十五里

有奇半之各得東西數

臣鸞曰求冬至正東西方不見日法列冬至日道徑四十七萬六千里爲弦重張相乘得二千二百六十五億七千六百萬里爲弦實更列極去周十萬三千里倍之得二十萬六千里爲勾重張相乘得四百二十四億三千六百萬以減弦實餘一千八百四十一億四十萬卽股實開方除之得周直東西四十二萬九千一百一十五里

八十五萬八千二百三十一分里之三十一萬六千七百七十五半卽周一方去日二十一萬四千五百五十七里半亦倍分母得一百七十一萬六千四百六十二分里之三十一萬六千七百七十五

凡此數者日道之發歛

凡此上周徑之數者日道往還之所至晝夜長短之所極

冬至夏至觀律之數聽鐘之音

觀律數之生聽鐘音之變知寒暑之極明代序之化也

冬至晝夏至夜

冬至晝夜日道徑半之得夏至晝夜日道徑法置冬至日道徑四十七萬六千半之得夏至日中去夏至夜半二十三萬八千里以四極之里也

差數及日光所還觀之

以差數之所及日光所還以此觀之則四極

之窮也

四極徑八十一萬里

從極南至冬至日中二十三萬八千里又日光所照十六萬七千里凡徑四十萬五千里北至其夜半亦然故日徑八十一萬里八十一者陽數之終日之所極

臣鸞曰求四極徑八十一萬里法列冬至日中去極二十三萬八千里復加冬至日光所極十六萬七千里得四十萬五千里

北至其夜半亦然并南北卽是大徑八十一萬里

周二百四十三萬里

三乘徑卽周

臣鸞曰以三乘八十一萬里得周二百四十三萬自此以外日所不及也

從周至南日照處三十萬二千里

半徑除周去極十萬三千里

臣鸞曰求周南三十萬二千里法列半徑

四十萬五千以王城去極十萬三千里減
之餘卽周南至日照處三十萬二千里
周北至日照處五十萬八千里
半徑加周去極十萬三千里

臣鸞曰求周去冬至夜半日北極照處五
十萬八千里法列半道徑四十萬五千里
加周夜半去極十萬三千里得冬至夜半
北極照去周五十萬八千里

東西各三十九萬一千六百八十三里半

求之術以徑八十一萬里爲弦倍去周十萬
三千里得二十萬六千里爲勾爲之求股得
七十八萬三千三百六十七里有奇半之各
得東西之數

臣鸞曰求東西各三十九萬一千六百八
十三里半法列徑八十一萬里重張自乘
得六千五百六十一億爲弦實更置倍周
去北極二十萬六千里爲勾重張自乘得
四百二十四億三千六百萬以減弦實餘



六千一百三十六億六千四百萬卽股實
以開方除之得股七十八萬三千三百六
十七里一百五十六萬六千七百三十五
分里之十四萬三千三百一十一半之卽
得去周三十九萬一千六百八十三里半
分母亦倍之得三百一十三萬三千四百
七十分里之十四萬三千三百一十一也
周在天中南十萬三千里故東西矩中徑二萬
六千六百三十二里有奇

求矩中徑二萬六千六百三十二里有奇法
六列八十一萬里以周東西七十八萬三千三
百六十七里有奇減之餘卽矩中徑之數
至日臣鸞曰求矩中徑二萬六千六百三十二
里有奇法列八十一萬里以周東西七十
八萬三千三百六十七里有奇減之餘二
萬六千六百三十三里取一里破爲一百
五十六萬六千七百三十五分減一十四
萬三千三百一十一餘一百四十二萬三

千四百二十四即徑東西矩二萬六千六百三十二里一百五十六萬六千七百三十五分里之一百四十二萬三千四百二十四


周北五十萬八千里冬至日十三萬五千里冬至日道徑四十七萬六千里周一百四十二萬八千里日光四極當周東西各三十九萬一千六百八十三里有奇
此方圓之法

此言求圓於方之法



萬物周事而圓方用焉大匠造制而規矩設焉或毀方而為圓或破圓而為方方中為圓者謂之圓方圓中為方者謂之方圓也

七衡圖



外方 圓實 青色 中俱 黃色 內北 極小 國青 之色 實之

七衡圖註

趙君卿曰青圖畫者天地合際人目所遠者也天至高地至卑非合也人目極觀而天地合也日入青圖畫內謂之日出出青圖畫外謂之日入青圖畫之內外皆天也北辰正居天中之央人所謂東西南北者非有常處各以日出之處爲東日中爲南日入爲西日沒爲北北辰之下六月見日六月不見日從春分至秋分六月常見日從秋分至春分六月

周髀算經卷上
五
常不見日見日爲晝不見日爲夜所謂一歲者卽北辰之下一晝一夜黃圖畫者黃道也二十八宿列焉日月星辰躔焉使青圖在上不動貫其極而轉之卽交矣我之所在北辰之南非天地之中也我之卯酉非天地之卯酉內第一夏至日道也出第四春秋分日道也外第七冬至日道也皆隨黃道日冬至在牽牛春分在婁夏至在東井秋分在角冬至從南而北夏至從北而南終而復始也

凡爲此圖以丈爲尺以尺爲寸以寸爲分分一千里凡用繒方八尺一寸今用繒方四尺五分分爲二千里

方爲四極之圖盡七衡之意

呂氏曰凡四海之內東西二萬八千里南北二萬六千里

呂氏秦相呂不韋作呂氏春秋此之義在有始第一篇非周髀本文爾雅云九夷八狄七戎六蠻謂之四海言東西南北之數者將以

周髀算經卷上
明車轍馬跡之所至河圖括地象云而有君
長之州九阻中國之文德及而不治又云八
極之廣東西二億二萬三千五百里南北二
億三萬三千五百里淮南子地形訓云禹使
大章步自東極至于西極孺亥步自北極至
于南極而數皆然或其廣濶將焉可步矣亦
後學之徒未之或知也夫言億者十萬曰億
也

凡爲日月運行之圓周

春秋分冬至夏至躋璣之運也

七衡周而六間以當六月節六月爲百八十二
日八分日之五

節六月者從冬至至夏至日百八十二日八
分日之五爲半歲六月節者謂中氣也不盡
其日也此日周天通四分之一之倍法四以除
之卽得也

臣鸞曰求七衡周而六間以當六月節六
月爲一百八十二日八分日之五此爲半

周髀算經卷上
歲也列周天三百六十五日四分日之一
通分內子得一千四百六十一爲實倍分
母四爲八除實得半歲一百八十二日八
分日之五也

故日夏至在東井極內衡日冬至在牽牛極外
衡也

東井牽牛爲長短之限內外之極也
衡復更終冬至

冬至日從外衡還黃道一周年復於故衡終

於冬至

故曰一歲三百六十五日四分日之一一歲一
內極一外極

從冬至一內極及一外極度終於星月窮於
次是爲一歲

三十日十六分日之七月一外極一內極

欲分一歲爲十二月一衡間當一月此舉中
相去之日數以此言之月行二十九日九百
四十分日之四百九十九則過周天一日而

與月合宿論其入內外之極六歸粗通未心得也日光言內極月光言外極日陽從冬至起月陰從夏至起往來之始易曰日往則月來月往則日來此之謂也此數置一百八十二日八分日之五通分內子五以六間乘分母以除之得三十以三約法得十六約餘得七

臣鸞曰求三十日十六分日之七法列半歲一百八十二日八分日之五通分內子得一千四百六十一為實以六間乘分母八得四十八除實得三十日不盡二十一更置法實求等數平於三即以約法得十六約餘得七即是從中氣相去三十日十六分日之七也

是故 衡之間萬九千八百三十三里三分里之一即為百步

此數夏至冬至相去十一萬九千里以六間除之得矣法與餘分皆半之

臣鸞曰求一衡之間一萬九千八百三十三里三分里之一法置冬至夏至相去十一萬九千里以六間除之即得法與餘分半之得也

欲知次衡徑倍而增內衡之徑

倍一衡間數以增內衡

二之以增內衡徑

二乘所倍一衡之間數以增內衡徑即得三衡徑

次衡放此

次至皆如數

內一衡徑二十三萬八千里周七十一萬四千里分爲三百六十五度四分度之一度得一千九百五十四里二百四十七步千四百六十一分步之九百三十三

通周天四分之一爲法又以四乘衡周爲實實如法得一百步不滿法者十之如法得十步不滿法者十之如法得一步不滿者以法

命之至七衡皆如此

臣鸞曰求內衡度法置夏至徑二十三萬八千里以三乘之得內外衡周七十一萬四千里以周天分母四乘內衡周得二百八十五萬六千里爲實以周天分一千四百六十一爲法除之得一千九百五十四里不盡一千二百六即而三之爲三千六百十八以法除之得二百步不盡六百九十六步上十之如法而得四十步不盡一

千一百一十六復上十之如法而一得七百步不盡九百三十三卽是一千九百五十四里二百四十七步一千四百六十一分步之九百三十三

次二衡徑二十七萬七千六百六十六里二百步周八十三萬三千里分里爲度度得二千二百八十里百八十八步千四百六十一分步之千三百三十二

通周天四分之一爲法四乘衡周爲實實如

六里百三十步千四百六十一分步之二百七十

通周天四分之一為法四乘衡周為實實如法得里數不滿法者求步數不盡者命分

臣鸞曰求第三衡法列倍一衡間得三萬九千六百六十六里三分里之二增第二衡徑二十七萬七千里六百六十六里二百步即三分里之二得第三衡徑三十二萬七千三百三十三里一百步以三乘徑

步步滿三百成里得周九十五萬二千里又以分母四乘周得三百八十萬八千為實以周天分一千四百六十一為法以除實得二千六百六里不盡六百三十四以三百乘之以法除之得一百三十步不盡二百七十即是度得二千六百六里一百三十步一千四百六十一分步之二百七十

次四衡徑三十五萬七千里周一百七萬一千

法得里數不滿者求步數不盡者命分

臣鸞曰求第二衡法列一衡間一萬九千八百三十三里少半里倍之得三萬九千六百六十六里太半里增內衡徑二十三萬八千里得第二衡徑二十七萬七千六百六十六里二百步是三分里之二又以三乘之步滿三百成一里得二衡周八十三萬三千里以周天分母四乘周得三百三十三萬二千爲實更置周天三百六十

五度四分度之一通分內子得一千四百六十一爲法除之得二千二百八十里不盡九百二十以三百乘之得二十七萬六千復以前法除之得一百八十八步不盡一千三百三十二卽是度得二千二百八十里一百八十八步一千四百六十一分步之一千三百三十二

次三衡徑三十一萬七千三百三十三里一百步周九十五萬二千里分爲度度得二千六百

里分爲度度得二千九百三十二里七十一歩
千四百一十分歩之六百六十九

通周天四分之一爲法四乘衡周爲實實如
法得里數不滿法者求歩數不盡者命分

臣鸞曰求第四衡法列倍一衡間三萬九
千六百六十六里三分里之二增第三衡
徑三十一萬七千三百三十三里一百歩
歩滿三百成里得徑三十五萬七千里以
三乘之得周一百七萬一千里以分母乘

之得四百二十八萬四千里爲實以周天
分一千四百六十一除之得二千九百三
十二里不盡三百四十八以三百乘之以
法除之得七十一歩不盡六百六十九卽
是度得二千九百三十二里七十一歩一
千四百六十一分歩之六百六十九

次五衡徑三十九萬六千六百六十六里二百
歩周一百一十九萬里分爲度度得三千二百
五十八里十二歩千四百六十一分歩之千六

十八

通周天四分之一爲法四乘衡周爲實實如法得里數不滿法者求步數不盡者命分

臣鸞曰求第五衡法列倍第一衡間三萬九千六百六十六里三分里之二增第四衡徑三十五萬七千里滿三百成里得第五衡徑三十九萬六千六百六十六里二百步以三分乘徑得周一百二十九萬里又以分母四乘周得四百七十六萬爲實

以周天分一千四百六十一爲法除之得三千二百五十八里不盡六十二以三百乘之以法除之得十二步不盡一千六十八卽是度得三千二百五十八里十二步一千四百六十一分步之一千六十八次六衡徑四十三萬六千三百三十三里一百步周一百三十萬九千里分爲度度得三千五百八十三里二百五十四步千四百六十一分步之六

通周天四分之一爲法四乘衡周爲實實如法得一里不滿法者求步不盡者命分

臣鸞曰求第六衡法列倍第一衡間三萬九千六百六十六里三分里之二以增第五衡徑三十九萬六千六百六十六里一百步又三乘徑得周一百三十萬九千里又以分母四乘周得五百二十三萬六千爲實以周天分一千四百六十一爲法除之得三千五百八十三里不盡一千二百

三十七以三百乘之以法除之得二百五十四步不盡六卽是度得三千五百八十三里二百五十四步一千四百六十一分步之六

次七衡徑四十七萬六千里周一百四十二萬八千里分爲度得三千九百九里一百九十五步千四百六十一分步之四百五

通周天四分之一爲法四乘衡周爲實實如法得里數不滿法者求步數不盡者命分

臣鸞曰求第七衡法列倍第一衡間三萬
 九千六百六十六里三分里之二增第六
 衡徑四十三萬六千三百三十三里一百
 步得第七衡徑四十七萬六千里以三乘
 之得周一百四十二萬八千里以分母四
 乘之得五百七十一萬二千為實以周天
 分一千四百六十一為法除之得三千九
 百九里不盡九百五十一又以三百乘之
 所得以法一千四百六十一除之得一百

九十五步不盡四百五即是度得三千九
 百九里一百九十五步一千四百六十一
 分步之四百五

其次曰冬至所北照過北衡十六萬七千里

冬至十一月日在牽牛徑在北方因其在北

故言照過北衡

為徑八十一萬里

倍所照增七衡徑

周二百四十三萬里

三乘倍增七衡周

分爲三百六十五度四分度之一度得六千六百五十二里二百九十三步千四百六十一分步之三百二十七過此而往者未之或知

過八十一萬里之外

或知者或疑其可知或疑其難知此言上聖不學而知之

上聖者智無不至明無不見攷靈曜曰微式出冥唯審其形此之謂也

故冬至日晷丈三尺五寸夏至日晷尺六寸冬至日晷長夏至日晷短日晷損益寸差千里故冬至夏至之日南北遊十一萬九千里四極徑八十一萬里周二百四十三萬里分爲度度得六千六百五十二里二百九十三步千四百六十一分步之三百二十七此度之相去也

臣鸞曰求冬至日所北照十六萬七千里并南北日光得三十三萬四千里增冬至日道徑四十七萬六千里得八十一萬里

三之得周二百四十三萬以周天分母四
乘之得九百七十二萬里爲實以周天分
一千四百六十一爲法除之得六千六百
五十二里不盡一千四百二十八以三百
乘之得四十三萬八千四百復以法除之
得二百九十三步不盡三百二十七卽是
度得六千六百五十二里二百九十三步
至日一千四百六十一分步之三百二十七
其南北游日六百五十一里一百八十二步一

千四百六十一分步之七百九十八

術曰置十一萬九千里爲實以半歲一百八十
二日八分日之五爲法

半歲考從外衡去內衡以爲法除相去之數
得一日所行也

而通之

通之者數不合齊以法等得相通入以八乘
也

得九十五萬二千爲實

通十一萬九千里

所得一千四百六十一爲法除之

通百八十二日八分日之五也

實如法得一里不滿法者三之如法得百步

一里三百步當以三百乘而言之三之者不欲轉法便以一位爲百實故從一位命爲百不滿法者十之如法得十步

上下用三百乘故此十之便以位爲十實故從一位命爲十

不滿法者十之如法得一步

復十之者但以一位爲實故從一位命爲一不滿法者以法命之

位盡於一步故以法命其餘分爲殘步

臣鸞曰求南北游法置冬至十一萬九千里以半歲日分母八乘之得九十五萬二千爲實通半歲一百八十二日八分日之五得一千四百六十一以除得六百五十一里不盡八百八十九以三百乘之得二

十六萬六千七百復以法除之得一百八十二步不盡七百九十八即得日南北遊日六百五十一里一百八十二步一千四百六十一分步之七百九十八

周髀算經卷上

周髀算經卷下

漢 趙君卿 注

北周漢中郡守前司隸臣甄鸞重述

唐朝議矣行矣令上輕車都尉臣李淳風等奉勅注釋

明 毛 晉 校

凡日月運行四極之道

運周也極至也謂外衡也日月周行四方至外衡而還故曰四極也

極下者其地高人所居六萬里滂沲四隤而下

游北極從外衡主極下乃高六萬里而言人所居蓋復盡外衡滂四隕而下如覆槃也

天之中央亦高四旁六萬里

四旁猶四極也隨地穹窿而高如蓋笠

故日光外所照徑八十一萬里周二百四十三萬里

日至外衡而還出其光十六萬七千里故日照

故日運行處極北北方日中南方夜半日在極

東東方日中西方夜半日在極南南方日中北方夜半日在極西西方日中東方夜半凡此四方者天地四極四和

四和者謂之極子午卯酉得東西南北之中天地之所合四時之所交風雨之所會陰陽之所和然則百物阜安草木蕃庶故曰四和晝夜易處

南方爲晝北方爲夜

加四時相及

南方日中北方夜半

然其陰陽所終冬至所極皆若一也

陰陽之數齊冬夏之節同寒暑之氣均長短之晷等周迴無差運變不二

天象蓋笠地法覆槃

見乃謂之象形乃謂之法在上故準蓋在下故擬槃象法義同蓋槃形等互文異器以別尊卑仰象俯法名號殊矣

天離地八萬里

然其隆高相從其相去八萬里

冬至之日雖在外衡常出極下地上二萬里

天地隆高高列外衡六萬里冬至之日雖在外衡其相望爲平地直常出地北極下地上二萬里言日月不相障蔽故能揚光於晝納明於夜

故日兆月

日者陽之精譬猶火光月者陰之精譬猶水光月含影故月光生於日之所照魄生於日

之所蔽當日即光盈就日即明盡月稟日光
而成形兆故云日兆月也

月光乃出故成明月

待日然後能舒其光以成其明

星辰乃得行列

靈憲曰衆星被曜因水火轉光故能成其行

列

是故秋分以往到冬至三光之精微以成其道

遠

日從中衡往至外衡其徑日遠以其相遠故

光微不言從冬至到春分者俱在中衡之外

其同可知

此天地陰陽之性自然也

自然如此故曰性也

欲知北極樞璿周四極

極中不動璿璣也言北極璿璣周旋四至極

至也

常以夏至夜半時北極南游所極

游在樞南之所至

冬至夜半時北游所極

游在樞北之所至

冬至日加酉之時西游所極

游在樞西之所至

日加卯之時東游所極

游在樞東之所至

此北極璿璣四游

北極游常近冬至而言夏至夜半者極見冬

至夜半極不見也

正北極璿璣之中正北天之中正極之所游

極處璿璣之中天心之正故曰璿璣也

冬至日加酉之時立八尺表以繩繫表顛希

北極中大星引繩致地而識之

顛首希仰致至也識之者所望大星表首及

繩至地參相直而識之也

又到旦明日加卯之時復引繩希望之首及繩

致地而識其端相去二尺三寸

日加卯酉之時望至地之相去子也

故東西極二萬三千里

影寸千里故爲東西所致之里數也

其兩端相去正東西

以繩至地所謂兩端相直爲東西之正也

中折之以指表正南北

所識兩端之中與表爲南北之正

加此時者皆以漏揆度之此東西南北之時

冬至日加卯酉者北極之正東西日不見矣

以漏度之者一日一夜百刻從半夜至日中

從日中至夜半無冬夏常各五十刻中分之

得二十五刻加極卯酉之時揆亦度也

其繩致地所識去表丈三寸故天之中去周十

萬三千里

北極東西之時與天中齊故以所望表勾爲

天之去周之里數

何以知其南北極之時以冬至夜半北游所極

也北過天中萬一千五百里以夏至南游所極

不及天中萬一千五百里此皆以繩繫表顛而
希望之北極至地所識丈一尺四寸半故去周
十二萬四千五百里過天中萬一千五百里其
南極至地所識九尺一寸半故去周九萬一千
五百里其南不及天中萬一千五百里此璿璣
四極南北過不及之法東西南北之正勾

以表為股以影為勾繩至地所亦加矩中徑
二萬六千六百三十二里有奇法列八十一
萬里以周東西七十八萬三千三百六十七

里有奇減之餘二萬六千六百三十三里取
一里破為一百五十六萬六千七百三十五
分減一十四萬三千三百一十一餘一百四
十二萬三千四百二十四即徑東西二萬六
千六百三十二里一百五十六萬六千七百
三十五分里之一百四十二萬三千四百二
十四

周去極十萬三千里日去人十六萬七千里夏
至去周一萬六千里夏至日道徑二十三萬八

千里周七十一萬四千里春秋分日道徑三十
五萬七千里周一百七萬一千里冬至日道徑
四十七萬六千里周一百四十二萬八千里日
光四極八十一萬里周二百四十三萬里從周
南三十萬二千里

影言正勾者四方之影皆正而定也

璿璣徑二萬三千里周六萬九千里此陽絕陰
彰故不生萬物

春秋分謂之陰陽之中而日光所照適至璿

璣之徑爲陽絕陰彰故萬物不復生也

其術曰立正勾定之

正四方之法也

以日始出立表而識其晷日入復識其影晷之
兩端相直者正東西也中折之指表者正南北
也極下不生萬物何以知之

以何法知之也

冬至之日去夏至十一萬九千里萬物盡死夏
至之日去北極十一萬九千里是以知極下不

生萬物北極左右夏有不釋之冰

冰凍不解是以推之夏至之日外衡之下爲冬矣萬物當死此日遠近爲冬夏非陰陽之氣爽或疑焉

春分秋分日在中衡春分以往日益北五萬九千五百里而夏至秋分以往日益南五萬九千五百里而冬至

并冬至夏至相去十一萬九千里以往日益北近中衡以往日益南遠中衡

中衡去周七萬五千五百里

影七尺五寸五分

中衡左右冬有不死之草夏長之類

此欲以內衡之外外衡之內常爲夏也然其修廣爽未之前聞

此陽彰陰微故萬物不死五穀一歲再熟

近日陽多農再熟

凡北極之左右物有朝生暮獲

獲疑作穫謂葶藶薺麥冬生之類北極之下

從春分至秋分爲晝從秋分至春分爲夜物
有朝生暮獲者亦有春芻而秋熟然其所育
皆是周地冬生之類薺麥之屬言左右者不
在璿璣二萬三千里之內也此陽微陰彰故
無夏長之類

立二十八宿以周天曆度之法

以用也列二十八宿之度用周天

術曰倍正南方

倍猶背也正南方者二極之正南北也

以正勾定之

正勾之法日出入識其晷晷兩端相直者正
東西中折之以指表正南北

即平地徑二十一步周六十三步令其平矩以
水正

如定水之平故曰平矩以水正也

則位徑一百二十一尺七寸五分因而三之爲
三百六十五尺四分尺之一

徑一百二十一尺七寸五分周三百六十五

尺二寸五分者四分之一而或言一百二十尺舉其全數

以應周天三百六十五度四分度之一審定分之無令有纖微

所分平地周一尺爲一度二寸五分爲四分度之一其令審定不欲使有細小之差也纖微細分也

臣鸞曰求一百二十一尺七寸五分因而三之爲三百六十五度四分度之一法列

徑一百二十一尺七寸五分以三乘得三百六十五尺二寸五分二寸五分者即四分之三此即周天三百六十五度四分度之一

分度以定則正督經緯而四分之一合各九十一度十六分度之五

南北爲經東西爲緯督亦通尺周天四分之一又以四乘分母以法除之

臣鸞曰求分度以定四分之一合各九十一

一度十六分度之五法列周天三百六十
五度以四分度之一而通分內之五法千
四百六十一爲實更以四乘分母得十六
爲法除之得九十一不盡五即是各九十
一度十六分度之五也

於是圓定而正

分所圓爲天度又四分之皆定而正
則立表正南北之中央以繩繫顛希望牽牛中
央星之中

引繩至經緯之交以望之星與表繩參相直
也

則復望須女之星先至者
復候須女中則當以繩望之

如復以表繩希望須女先至定中

須女之先至者又復如上引繩至經緯之交
以望之

即以一游儀希望牽牛中央星出中正表西幾
何度

游儀亦表也游儀移望星爲正知星出中正之表西幾何度故曰游儀

各如游儀所至之尺爲度數
所游分圓周一尺應天一度故以游儀所至尺數爲度

游在於八尺之上故知牽牛八度

須女中而望牽牛游在八尺之上故牽牛爲八度

其次星放此以盡二十八宿度則之矣

皆如此上法定

立周度者

周天之度

各以其所先至游儀度上

二十八宿不以一星爲體皆以先至之星爲正之度

車輻引繩就中央之正以爲轂則正矣

以經緯之交爲轂以圓度爲輻知一宿得幾何度則引繩如輻湊轂爲正望星定度皆以

方爲正南知二十八宿爲幾何度然後環而布之也

日所以入亦以周定之

亦同望星之周

欲知日之出入

出入二十八宿東西南北面之宿列置各應其方立表望之知日出入何宿從出入徑幾何度

即以三百六十五度四分度之一而各置二十

八宿

以二十八宿列置地所圓周之度使四面之宿各應其方

以東井夜半中牽牛之初臨子之中

東井牽牛相對之宿也東井臨午則牽牛臨於子也

東井出中正表西三十度十六分度之七而臨未之中牽牛初亦當臨丑之中

分周天之度爲十二位而十二辰各當其一

周髀算經卷下
十四
所應十二月從午至未三十度十六分度之
七未與丑相對而東井牽牛之所居分之法
已陳於上矣

臣鸞曰求東井出中正表西三十度十六
分度之七法先通周天得一千四百六十
一爲實以位法十二乘周天分母以得四
十八爲法除實得三十度不盡二十一更
副置法實等數平於三約不盡二十一得
七約法四十八得十六即位三十度二十

六分度之七

於是天與地協

協合也置東井牽牛使居丑未相對則天之
列宿與地所爲圖周相應合得之矣

乃以置周二十八宿

從東井牽牛所居以置十二位焉

置以定乃復置周度之中央立正表

置周度之中央者經緯之交也

以冬至夏至之日以望日始出也立一游儀於

度上以望中央表之晷

從日所出度上立一游儀皆望中表之晷所以然者當曜不復當日得以覘之也

晷參正則日所出之宿度

游儀與中央表及晷參相直游儀之下即所出合宿度

日入放此

此日出法求之

牽牛去北極百一十五度千六百九十五里二

十一步千四百六十一分步之八百一十九

牽牛冬至日所在之宿於外衡者與極相去之度數

術曰置外衡去北極樞二十三萬八千里除璿璣萬一千五百里

北極常近牽牛爲樞過極萬一千五百里此求去極故以除之

其不除者二十二萬六千五百里以爲實

以三百乘之里爲步以周天分一千四百六

十一乘步分內衡之度以周天分爲法法有
分故以周天乘實齊同之得九百九十二億
七千四百九十五萬

以內衡一度數千九百五十四里二百四十七
步千四百六十一分步之九百三十三以爲法
如上乘內步步爲通分內子得八億五千六
百八十萬

實如法得一度

以八億五千六百八十萬爲一度法

不滿法求里步

上求度故以此次求里次求步

約之合三百得一以爲實

上以三百乘里爲步而求里故以三百約餘
分爲里之實

以千四百六十一分爲法得一里

里步皆以周天之分爲母求度當齊同法實
等故乘以散之度以定當次求故還爲法
不滿法者三之如法得百步

上以三百約之爲里之實此當以三乘之爲步之實而言之者不欲轉法更以一位爲百實故從一位命爲百也

不滿法者又上十之如法得一步

又復上之者便以一位爲一實故從一實爲

不滿法者以法命之

位盡於一步故以其法命餘爲殘分

次放此

次婁與角及東井皆如此也

臣鸞曰求牽牛星去極法先列衡去極樞二十三萬八千里減極去樞心一萬一千五百里餘二十二萬六千五百里以三百乘里得六千七百九十五萬步又以周天分一千四百六十一乘之得九百九十二億七千四百九十五萬步爲實更副置內衡一度數一千九百五十四里二百四十七步一千四百六十一分步之九百三十

三亦以三百乘一千九百五十四里爲步
內二百四十七步得五十八萬六千四百
四十七步又以周天分母千四百六十一
乘步內子九百三十三得八億五千六百
八十萬爲法以除實得一百一十五度不
盡七億四千二百九十五萬去下法不用
更以三百約餘分七億四千二百九十五
萬得二百四十七萬六千五百爲實更以
周天分千四百六十一除之得一千六百

九十五里不盡一百五以三百乘之得三
萬一千五百復以前法除之得二十一步
不盡八百一十九即牽牛去北極一百二
十五度千六百九十五里二十一步千四
百六十一分步之八百一十九
婁與角去北極九十一度六百一十里二百六
十四步千四百六十一分步之千二百九十六
婁春分日所在之宿也角秋分日所在之宿
也爲中衡也

術曰置中衡去北極樞十七萬八千五百里以爲實

不言加除者婁與角准北極在樞兩旁正與樞齊以婁角無差故便以去樞之數爲實如上乘里爲步步爲分得七百八十二億三千六百五十五萬

以內衡一度數爲法實如法得一度不滿法者求里步不滿法者以法命之

臣鸞曰求婁與角去極法列中衡去極樞

十七萬八千五百里以三百乘之得五千三百五十五萬步又以周天分千四百六十一分乘之得七百八十二億三千六百五十五萬爲實以內衡一度數千九百五十四里二百四十七步千四百六十一分步之九百三十三亦以三百乘里內步二百四十七得五十八萬六千四百四十七步又以分母千四百六十一分乘之內子得八億五千六百八十萬爲法以除實得

九十一度不盡二億六千七百七十五萬
以三百約之得八十九萬二千五百下法
不用以周天分千四百六十一除之得六
百一十里不盡千二百九十以三百乘之
得三十八萬七千如前法除之得二百六
十四步不盡一千二百九十六即是婁與
角去極九十一度六百一十里二百六十
四步千四百六十一分步之千二百九十
六

東井去北極六十六度千四百八十一里一百
五十五步千四百六十一分步之千二百四十
五

東井夏至日所在之宿爲內衡

術曰置內衡去北極樞十一萬九千里加璿璣
萬一千五百里

北極游常近東井爲樞不及極萬一千五百
里此求去極故加之

得十三萬五百里以爲實

如上乘里爲步步爲分得五百七十一億九千八百一十五萬分

以內衡一度數爲法實如法得一度不滿法者求里步不滿者以法命之

臣鸞曰求東井去極法列內衡去極樞十一萬九千里加璿璣萬一千五百里得十三萬五百里以三百乘里爲步復以分母千四百六十一乘之得五百七十一億九千八百一十五萬爲實通分內衡一度數

爲步步爲分得八億五千六百八十萬爲法以除實得六十六度不盡六億四千九百三十五萬以三百約之得二百一十六萬四千五百下法不用更以周天千四百六十一爲法除之得千四百八十一里不盡七百五十九以三百乘之得二十二萬七千七百復以周天分除之得一百五十五步不盡一千二百四十五即是東井去北極六十六度千四百八十一里一百五

十五步千四百六十一分步之一千二百
四十五

凡八節二十四氣氣損益九寸九分六分分之
一冬至晷長一丈三尺五寸夏至晷長一尺六
寸問次節損益寸數長短各幾何

冬至晷長一丈三尺五寸

小寒丈二尺五寸五分

大寒丈一尺五寸一分四分

立春丈五寸二分三分

雨水九尺五寸二分二分

啓蟄八尺五寸四分一分

春分七尺五寸五分

清明六尺五寸五分五分

穀雨五尺五寸六分四分

立夏四尺五寸七分三分

小滿三尺五寸八分二分

芒種二尺五寸九分一分

夏至一尺六寸

小暑二尺五寸九分一分

大暑二尺五寸八分二分

立秋四尺五寸七分三分

處暑五尺五寸六分四分

白露六尺五寸五分五分

秋分七尺五寸五分

寒露八尺五寸四分一分

霜降九尺五寸三分二分

立冬丈五寸二分三分

小雪丈一尺五寸一分四分

大雪丈二尺五寸五分

凡為八節二十四氣

二至者寒暑之極二分者陰陽之和四立者生長收藏之始是為八節節三氣三而八之故為二十四

氣損益九寸九分六分分之一

損者減也破一分為六分然後減之益者加也以小分滿六得一從分

周髀算經卷下
冬至夏至為損益之始

冬至晷長極當反短故為損之始夏至晷短極當反長故為益之始此爽之新術

術曰置冬至晷以夏至晷減之餘為實以十二為法

十二者半歲十二氣也為法者一節益之法實如法得一寸不滿法者十之以法除之得一

分
求分故十之也

不滿法者以法命之

法與餘分皆半之也舊晷之術於理未當謂春秋分者陰陽晷等各七尺五寸五分故中衡去周七萬五千五百里按春分之影七尺五寸七百二十三分秋分之影七尺四寸二百六十二分差一寸四百六十一分以此推之是為不等冬至至小寒多半日之影夏至至小暑少半日之影芒種至夏至多二日之影大雪至冬至多三日之影又半歲一百八

周髀算經卷下
十二日八分日之五而此用四分日之二率
故一日得七百三十分寸之四百七十六非
也節候不正十五日有二十二分日之七以
一日之率十五日爲一節至令差錯不通尤
甚易曰舊井無禽時舍也言法三十日實當
改而舍之於是爽更爲新術以一氣率之使
言約法易上下相通周而復始除紕繆

臣鸞曰求二十四氣損益之法先置冬至
影長丈三尺五寸以夏至影一尺六寸減

之餘一丈一尺九寸上十之爲實以半歲
十二爲法除之得九寸不盡十一復上十
之如法而一得九分不盡二與法十二皆
半之得六分之一即是氣損益法先置冬
至影長丈三尺五寸以氣損益九寸九分
六分之一其破一分以爲六分減其餘
即是小寒影長丈二尺五寸小分五餘悉
依此法求益法置夏至影一尺六寸以九
寸九分六分之一增之小分滿六從大

分一即是小暑二尺五寸九分小分一次
氣倣此

臣淳風等謹按此術本及趙君卿註求二
十四氣影例損益九寸九分六分分之一
以爲定率檢勘術註所未通又按宋書
曆志所載何承天元嘉曆影冬至一丈三
尺小寒一丈二尺四寸八分大寒一丈一
尺三寸四分立春九尺九寸一分雨水八
尺二寸八分啓蟄六尺七寸二分春分五

尺三寸九分清明四尺二寸五分穀雨三
尺二寸五分立夏二尺五寸小滿一尺九
寸七分芒種一尺九寸九分夏至一尺五
寸小暑一尺六寸九分大暑一尺九寸七
分立秋二尺五寸處暑三尺三寸五分白
露四尺二寸五分秋分五尺三寸九分寒
露六尺七寸二分霜降八尺二寸八分立
冬九尺九寸一分小雪一丈一尺三寸四
分大雪一丈二尺四寸八分司馬續漢志

所載四分曆影亦與此相近至如祖冲之
曆宋大明曆影與何承天雖有小差皆是
量天實數讐校三曆足驗君卿所立率虛
誕且周髀本文外衡下於天中六萬里而
二十四氣率乃足平遷所以知者按望影
之法日近影短日遠影長又以高下言之
日高影短日卑影長夏至之日最近北又
最高其影尺有五寸自此以後日行漸遠
向南天體又漸向下以及冬至至冬至之日

最近南居於外衡日最近下故日影一丈
三尺此當每歲差降有別不可均爲一槩
設其升降之理今此又自冬至畢于芒種
自夏至畢于大雪均差每氣損九寸有奇
是爲天體正平無高卑之異而日但南北
均行又無升降之殊即無內衡高於外衡
六萬里自相矛盾又按尚書考靈曜所陳
格上格下里數及鄭註升降遠近雖有成
規亦未臻理實欲求至當皆依天體高下

遠近修規以定差數自霜降畢於立春升
降差多南北差少自雨水畢於寒露南北
差多升降差少依此推步乃得其實然事
涉渾儀與蓋天相返

月後天十三度十九分度之七

月後天者月東行也此見日月與天俱西南
游一日一夜天一周而月在昨宿之東故曰
後天又曰章歲除章月加日周一日作率以
一日所行爲一度周天之日爲天度

術曰置章月二百三十五以章歲十九除之加
日行一度得十三度十分九度之七此月一日
行之數即後天之度及分

臣鸞曰月後天十三度十九分度之七法
列章月二百三十五以章歲十九除之得
十二度加日行一度得十三度餘十九分
度之七即月後天之度分

小歲月不及故舍三百五十四度萬七千八百
六十分度之六千六百一十二

小歲者十二月爲一歲一歲之月十二月則有餘十三月復不足而言大小歲通閏月爲不及故舍亦猶後天也假令十一月朔旦冬至日月俱起牽牛之初而月十二與日會此數月發牽牛所行之度也

術曰置小歲三百五十四日九百四十分日之三百四十八

小歲者除經歲十九分月之七以七乘周天分千四百六十一得萬二百二十七以減經

歲之積分餘三十三萬三千一百八則小歲之積分也以九百四十分除之即得小歲之積日及分

以月後天十三度十九分度之七乘之爲實通分內子爲二百五十四之乘者乘小歲積分也

又以度分母乘日分母爲法實如法得積後天四千七百三十七度萬七千八百六十分度之六千六百一十三

以月後天分乘小歲積分得八千四百六十萬九千四百三十二則積後天分也以度分毋十九乘日分毋九百四十得萬七千八百六十除之即得
以周天三百六十五度萬七千八百六十分度之四千四百六十五除之

此猶四分之一也約之即得當於齊同故細言之通分內子爲六百五十二萬三千三百六十五除積後天分得十二周天即去之

其不足除者

不足除者不及故舍之六百三十二萬九千

五十二是也

寅曰三百五十四度萬七千八百六十分度之六千六百一十一

二以萬七千八百六十除不及故舍之分得此分矣

此月不及故舍之分度數他皆放此

次至經月皆如此

臣鸞曰求小歲月不及故舍法列經歲三百六十五日九百四十分日之二百三十五通分內子得三十四萬三千三百三十

元月骨集身經卷下
三十一
五是爲經歲之積分以十九分月之七以
七乘周天分一千四百六十一得萬二百
二十七以減經歲積分不盡三十三萬三
千一百八小歲積分也以九百四十除之
得三百五十四日不盡三百四十八還通
分內子復得本積分三十三萬三千一百
八更置月後天十三度十九分度之七通
分內子得二百五十四以乘本積分得積
後天分八千四百六十萬九千四百三十

二爲實更列月後天分母十九以乘日分
母九百四十得萬七千八百六十爲法除
之得積後天四千七百三十七度不盡六
千六百一十二即是得四千七百三十七
度萬七千八百六十分度之六千六百一
十二還通分內子得本分八千四百六十
萬九千四百三十二爲實更列周天三百
六十五度萬七千八百六十分度之四千
四百六十五即通分內子得六百五十二

萬三千三百六十五以除實得十二下法
不用餘分即不及故舍之分六百三十二
萬九千五十二更以日月分母相乘得萬
七千八百六十爲法除分不及故舍之分
六百三十二萬九千五十二得三百五十
四度不盡六千六百一十二即不及故舍
三百五十四度萬七千八百六十分度之
六千六百一十二

大歲月不及故舍十八度萬七千八百六十分

度之萬一千六百二十八

大歲者十三月爲一歲也

術曰置大歲三百八十三日九百四十分日之
八百四十七

大歲者加經歲十九分月之十二以十二乘
周天分千四百六十一得萬七千五百三十
二以加經歲積分得三十六萬八百六十七
則大歲之積分也以七百四十除之即得
以月後天十三度十九分度之七乘之爲實又

以度分母乘日分母爲法實如法得積後天五千一百三十二度萬七千八百六十分度之二千六百九十八

此月後天分乘大歲積分得九千一百六十六萬二千一百一十八則積後天分也

以周天除之

除積後天分得十四周天即去之

其不足除者

不足除者三十三萬三千一百八是也

此月不及故舍之分度數

臣鸞曰求大歲月不及故舍法列經歲三百六十五日九百四十分日之二百三十五通分內子得經積分三十四萬三千三百三十五更以十九分月之十二乘周天分千四百六十一得一萬七千五百三十二以經歲積分加大歲積分得三十六萬八百六十七爲實以九百四十除之得大歲三百八十三日九百四十分日之八百

四十七還通分內子本分三十六萬八百
六十七更列月後天十三度十九分度之
七通分內子得二百五十四以乘本分得
積後天分九千一百六十六萬二百一十
八爲實以萬七千八百六十爲法除之得
積後天度五千一百三十二不盡二千六
百九十八即命分還通內子得本積後天
分九千一百六十六萬二百一十八爲實
以周天分六百五十二萬三千三百六十

五爲法除實得十四周天之數餘以日月
分母萬七千八百六十除之得大歲不及
故舍十八度不盡萬一千六百二十八即
以命分也

經歲月不及故舍百三十四度萬七千八百六
十分度之萬一百里

經常也即十二月十九分月之七也

術曰置經歲三百六十五日九百四十分日之
二百三十五

經歲者通十二月十九分月之七爲二百三十五乘周天千四百六十一得三十四萬三千三百三十五則經歲之積分又以周天分母四乘二百三十五得九百四十爲法除之即得

以月後天十三度十九分度之七乘之爲實又以度分母乘日分母爲法實如法得積後天四千八百八十二度萬七千八百六十分度之萬四千五百七十

以月後天分乘經歲積分得八千七百二十萬七千九十則積後天之分

以周天除之

除積後天分得十三周天即去之

其不足除者

不足除者二百四十萬三千三百四十五是也

此月不及故舍之分度數

臣鸞曰求經歲月不及故舍法列十二月

天原算經卷下
三十一
十九分月之七通分內子得二百三十五
以乘周天分千四百六十一得三十四萬
三千三百三十五即經歲分也以日分母
四乘二百三十五得九百四十爲法以除
得經歲三百六十五日不盡二百三十五
即命分還通分內子即復本歲分三十四
萬三千三百三十五更列通月後天度分
二百五十四以乘經歲分得積後天分八
千七百二十萬七千九十爲實更列萬七

千八百六十除實得積後天度四千八百
八十二不盡萬四千五百七十即命分還
通分內子復本積後天分爲實以周天分
六百五十二萬三千三百六十五除實得
十三周天即去之餘分三百四十萬三千
三百四十五以萬七千八百六十除之得
不及故舍百三十四度不盡萬一百五即
以命分也

小月不及故舍二十二度萬七千八百六十分

度之七千七百三十五

小月者二十九日爲一月一月之二十九日
則有餘三十日復不足而言大小者通其餘
分

術曰置小月二十九日

小月者減經月之積分四百九十九餘二萬
七千二百六十則小月之積也以九百四十
除之即得

以月後天十三度十九分度之七乘之爲實又
以度分母乘日分母爲法實如法得積後天三
百八十七度萬七千八百六十分度之萬二千
二百二十

以月後天乘小月積分得六百九十二萬四
千四十則積後天之分也

以周天分除之

除積後天分得一周天而去之
其不足除者

不足除者四十萬六百七十五

此月不及故舍之分度數

臣鸞曰求小月不及故舍法置二十九日
以九百四十乘之得二萬七千二百六十
則小月之分也更列月後天十三度十九
分度之七通分內子得二百五十四以乘
小月分得六百九十二萬四千四十爲實
以萬七千八百六十爲法除實得三百八
十七度不盡萬二千二百二十以命分還
通分內子得本實更列周天分六百五十

二萬三千三百六十五除本實得一周天
不盡四十萬六百七十五即不及故舍之
分又以萬九千八百六十除不及故舍之
分得二十二度不盡七千七百三十五即
以命分

大月不及故舍三十五度萬七千八百六十分
度之萬四千三百三十五

大月者三十日爲一月也

術曰置大月三十日

大月加經積分四百四十一得二萬八千二百則大月之積分也以九百四十除之即得
 以月後天十三度十九分度之七乘之為實又以度分母乘日分母為法實如法得積後天四百一度萬七千八百六十分度之九百四十
 以月後天分乘大月積分七百一十六萬二千八百則積後天之分也
 以周天除之
 除積後天分得一周天即去之

其不足除者

不足除者六十三萬九千四百三十五是也此月不及故舍之分度數

臣鸞曰求大月不及故舍法置三十日以九百四十乘之得二萬八千二百以後天分二百五十四乘之得七百一十六萬二千八百為實以萬七千八百六十為法以除實得四百一度不盡九百四十即以命分還通分內子復本實更以周天六百五

十二萬三千三百六十五為法除本實得
一周餘不足除積六十三萬九千四百三
十五分以萬七千八百六十為法以除實
得大月不及故舍三十五度不盡萬四千
三百三十五即命分也

經月不及故舍二十九度萬七千八百六十分
度之九千四百八十一

經常也常月者一月月與日合數

術曰置經月二十九日九百四十分日之四百

九十九

經月者以十九乘周天分一千四百六十一
得二萬七千七百五十九則經月之積以九
百四十除之即得

以月後天十三度十九分度之七乘之為實又
以度分母乘日分母為法實如法得積後天三
百九十四度萬七千八百六十分度之萬三千
九百四十六

以月後天分乘經月積分得七百五萬七百

八十六則積後天之分

以周天除之

除積後天分得一周天即去之

其不足除者

不足除者五十二萬七千四百二十一 是也
此月不及故舍之分度數

臣鸞曰求經月不及故舍法以十九乘周
天分千四百六十一得二萬七千七百五
十九即經月積分以九百四十除積分得

經月二十九日九百四十分日之四百九
十九還通分內子得本經月積分以後天
分乘本積分得七百五萬七百八十六即
後天之積分更以萬七千八百六十除之
得積後天三百九十四度不盡萬三千九
百四十六即以命分還通分內子得本後
天積分爲實以周天六百五十二萬三千
三百六十五除之得一周餘分五十二萬
七千四百二十一即不及故舍之分以一

萬七千八百六十除之得經月不及故舍
二十九度不盡九千四百八十一即以命
分

冬至晝極短日出辰而入申

如上日之分入何宿法分十二辰於地所圓
之周舍相去三十度十六分度之七子午居
南北卯酉居東西日出入時立一游儀以望
中央表之晷游儀之下即日出入

陽照三不覆九

陽日也覆猶徧也照三者南三辰巳午未
東西相當正南方

日出入相當不覆三辰爲正南方

夏至晝極長日出寅而入戌陽照九不覆三
不覆三者北方三辰亥子丑冬至日出入之
三辰屬晝晝夜互見是出入三辰分爲晝夜
各半明矣考靈曜曰分周天爲三十六頭頭
有十度九十六分度之十四長日分於寅行
二十四頭入於戌行十二頭短日分於辰行

十二頭入於申行二十四頭此之謂也

東西相當正北方

出入相當不覆三辰為北方

日出左而入右南北行

聖人南面而治天下故以東為左西為右日

冬至從南而北夏至從北而南故曰南北行

故冬至從坎陽在子日出巽而入坤見日光少

故曰寒

冬至十一月斗建子位在北方故曰從坎坎

亦北也陽氣所始故曰在子巽東南坤西南

日見少晷陽照三不覆九也

夏至從離陰在午日出艮而入乾見日光多故

曰暑

夏至五月斗建午位在南方故曰在午艮東

北乾西北日見多晷陽照九不覆三也

日月失度而寒暑相姦

考靈曜曰在璿璣玉衡以齊七政璿璣未中

而星中是急急則日過其度不及其宿璿璣

玉衡中而星未中是舒舒則日不及其度夜
月過其宿璿璣中而星中是周周則風雨時
風雨時則草木蕃盛而百穀熟故書曰急常
寒若舒常燠若急舒不調是失度寒暑不時
卽相姦

往者訕來者信也故屈信相感

從夏至南往日益短故曰訕從冬至北來日
益長故曰信言來往相推訕信相感更衰代
盛此天之常道易曰日往則月來月往則日

來日月相推而明生焉寒往則暑來暑往則
寒來寒暑相推而歲成焉往者訕也來者信
也訕信相感而利生焉此之謂也

故冬至之後日右行夏至之後日左行左者往
右者來

冬至日出從辰來北故曰右行夏至日出從
寅往南故曰左行

故月與日合爲一月

從合至合則爲一月

日復日為一日

從旦至旦則為一日

日復星為一歲

冬至日出在牽牛從牽牛周牽牛則為一歲也

外衡冬至

日在牽牛

內衡夏至

日在東井

六氣復返皆謂中氣

中氣月中也言日月往來中氣各六傳曰先王之正時履端於始舉正於中歸餘於終謂中氣也

陰陽之數日月之法

謂陰陽之度數日月之法

十九歲為一章

章條也言閏餘盡為法章條也乾象曰辰為歲中以御朔之月而納焉朔為章中除朔為

章月月差爲閏

臣鸞曰歲中除章中爲章歲求餘法置中氣相去三十日十六分日之七通分內子得四百八十七又置從朔至朔一月之日二十九九百四十分日之四百九十九通之得二萬七千七百五十九二者法異當同之者以中氣分母十六乘朔分得四十四萬四千一百四十四變爲中氣積分也以朔分母九百四十乘中氣分得四十五

萬七千七百八十爲朔日積分以少減多求等數平之得一千九百四十八爲法除中氣積得二百二十八卽章中也更以一千九百四十八除朔積分得二百三十五卽章月也章月與章中差七卽一章之閏更置二百二十八以歲中十二除之得十九爲章歲也更置章月二百三十五以章歲十九除之得十二月十九分月之七卽一年之月也

四章爲一蔀七十六歲

蔀之言齊同日月之分爲一蔀也一歲之月十二月十九分月之七通分內子得二百三十五一歲之日三百六十五日四分日之一通之得一千四百六十一分母不同則子不齊當互乘之以齊同之者以日分母四乘月分得九百四十卽一蔀之月以月分母十九乘日分得二萬七千七百五十九卽一蔀之日以日月分母相乘得七十六得一蔀之歲

以一歲之月除蔀月得七十六歲又以一歲之日除蔀日亦得七十六矣歲月餘旣終日分又盡衆殘齊合羣數畢滿故謂之蔀

臣鸞曰求蔀法列章歲十九以四乘之得一蔀七十六歲求一蔀之月法十二月十九分月之七通分內子得二百三十五卽月分也更列一歲三百六十五日四分日之一通分內子得一千四百六十一以日分母四乘月分得九百四十卽一蔀之月

以月分母十九乘日分得二萬七千七百
 五十九即一節之日以日分母四乘月分
 母十九得七十六即一節之歲更以月分
 母十九乘節月九百四十得萬七千八百
 六十為實以十二月十九分月之七通分
 內子得二百三十五為法以除實得七十
 六亦一節之歲也更列一節之日二萬七
 千七百五十九以分母四乘之得十一萬
 一千三十六為實以周天分千四百六十

一除之得一節之歲七十六也

二十節為一遂遂千五百二十歲

遂者竟也言五行之德一終竟極日月辰終
 也乾鑿度曰至德之數先立金木水火土五
 凡各三百四歲五德運行日月開闢甲子為
 節首七十六歲次得癸卯節七十六歲次壬
 午節七十六歲次辛酉節七十六歲凡三百
 四歲木德也主春生次庚子節七十六歲次
 巳卯節七十六歲次戊午節七十六歲次丁

酉部七十六歲凡三百四歲金德也主秋成
次丙子部七十六歲次乙卯部七十六歲次
甲午部七十六歲次癸酉部七十六歲凡三
百四歲火德也主夏長次壬子部七十六歲
次辛卯部七十六歲次庚午部七十六歲次
巳酉部七十六歲凡三百四歲水德也主冬
藏次戊子部七十六歲次丁卯部七十六歲
次丙午部七十六歲次乙酉部七十六歲凡
三百四歲土德也主致養其德四正子午卯

酉而朝四時焉凡一千五百二十歲終一紀
復甲子故謂之遂也求五德日名之法置一
部者七十六歲德四部因而四之爲三百四
歲以一歲三百六十五日四分日之一乘之
爲十一萬一千三十六以六十去之餘三十
六命甲子算外得庚子金德也求次德加三
十六去之命如前則次德日也求算部名置
一章歲數以周天分乘之得二萬七千七百
五十九以六十去之餘三十九命以甲子算

外得癸卯蔀求蔀加三十九滿六十去之命
如前得次蔀

臣鸞曰求遂法列一蔀七十六歲以二十
乘之得千五百二十歲即以遂之歲求五
德金木水火土法列一蔀七十六歲以周
天分千四百六十一乘之得十一萬一千
三十六卽以六十除之餘三十六命從甲
子算外得庚子凡三百四歲主秋成金德
也加三十六得七十二以六十除之餘十

二命從甲子算外得丙子凡三百四歲火
德主夏長次放此求蔀名列一章十九歲
以周天分一千四百六十一歲乘之得二
萬七千七百五十九以六十去之餘三十
九命從甲子算外得癸卯蔀七十六歲復
加三十九亦六十去之餘十八命亦起甲
子算外次得壬午蔀次放此至甲子卽止
之

三遂爲一首首四千五百六十歲

首始也言日月五星終而復始也考靈曜曰
日月首甲子冬至日月五星俱起牽牛初日
月合若璧五星如聯珠青龍甲寅攝提格並
四千五百六十歲積及初故謂首也

臣鸞曰求一首法列遂一千五百二十歲
三之得一首四千五百六十歲也

七首爲一極極三萬一千九百二十歲生數皆
終萬物復始

極終也言日月星辰弦望晦朔寒暑推移萬
物生育皆復始故謂之極

臣鸞曰求極先列一首四千五百六十以
以七乘之得一極三萬一千九百二十歲
也

天以更元作紀曆

元始作爲七紀法天數更始復爲法述之
何以知天三百六十五度四分度之一而日行
一度而月後天十三度十九分度之七二十九
日九百四十分日之四百九十九爲一月十二

月十九分月之七爲一歲

非周髀本文蓋人問師之辭其欲知度之所分法術之所生耳

周天除之

除積後天分得一周卽棄之

其不足除者如合朔古者包犧神農制作爲曆度元之始見三光未如其則

三光日月星則法也

日月列星未有分度

則星之初列謂二十八宿也

日主晝月主夜晝夜爲一日日月俱起建星

建六星在斗上也日月起建星謂十一月朔

旦冬至日也爲曆術者度起牽牛前五度則

建星其近也

月度疾日度遲

度日月所行之度也

日月相逐於二十九日三十日間

言日月二十九日則未合三十日復相過

而日行天二十九度餘

如九百四十分日之四百九十九

未有定分

未知餘分定幾何也

於是三百六十五日南極影長明日反短以歲終日影反長故知之三百六十五日者三三百六十六日者一

影四歲而後知差一日是爲四歲共一日故歲得四分日之一

故知一歲三百六十五日四分日之一歲終也月積後天十三周又與百三十四度餘

經數月後天之周故度求之餘者未知也言欲求之也

無慮後天十三度十九分度之七未有定

無慮者粗計也此已得月後天數而言未有者求之意未有見故也

於是日行天七十六周月行天千一十六周及合於建星

月行一月則行過一周而與日合七十六歲
九百四十周天所過復九百四十日七十六
周并之得一千一十六為一月後天率分盡
度終復還及初也

臣鸞曰求於是日行天七十六周日行天
千一十六周及合於建星法以九百四十
周并七十六周得一千一十六周則日月
氣朔合於建星

置月行後天之數以日後天之數除之得一十

二度十九分度之七則月一日行天之度

以日度行率除月行率一日得月度幾何置
月行率一千一十六為實日行率七十六為
法實如法而一法及餘分皆四約之與乾象
同歸而殊途義等而法異也

復置七十六歲之積月

置章歲之月二百三十五以四乘之得九百
四十則蔀之積月也

以七十六歲除之得十二月十九分月之七則

一歲之月

亦以四約法除分部歲除月與章歲除章月
同

置周天度數以十二月十九分月之七除之得
二十九日九百四十分日之四百九十九則一
月日之數

通周天四分日之一為千四百六十一通十
二月十九分月之七為二百三十五分母不
同則子不齊當互乘以同齊之以十九乘千
四百六十一為二萬七千七百五十九以四
乘二百三十五為九百四十及以除之則月
與日合之數

臣鸞曰求日行一度法還置前一千一十
六以七十六歲除之得十三度不盡二十
八以求等平於四以四約餘得七約分得
十九是十三度十九分度之七更列一章
歲積月二百三十五以周天分母四乘之
卽一節月九百四十亦以七十六歲除之

得一歲之十二月十九分月之七餘分及
 法並以四約更通周天得千四百六十一
 復通十二月十九分月之七得二百三十
 五分母不同互乘之以月分母十九乘日
 分得二萬七千七百五十九以日分母四
 乘月分得九百四十除之二萬七千七百
 五十九得二十九日九百四十分日之四
 百九十九而月與日合此其數也

周髀算經卷下 終

蔡邕云言天體者有三家一曰周髀二曰
 宣夜三曰渾天惟渾天者近得其情故耿
 壽昌錢樂輩各鑄銅為之象而鄭玄陸績
 吳時王蕃晉世姜岌張衡葛洪諸家論說甚
 詳至今猶存其制若宣夜者僅見虞喜云
 宣明也夜幽也幽明之數其術垂之故曰
 宣夜惜乎絕無時說莫得其傳惟周髀算
 經二卷尚未湮滅但命名之義或云周公
 受之商高周人志之故曰周或云髀者股

也伸圓之周而為勾展方之周而為股故
曰周髀或云天行健地體不動而天周其
上故曰周其說不偏余未能較正心謂天
文不到徒窺星漢之高也何因鹽官綉本
補而傳焉尚有疑圖一二擬擅孝轅珠祥
二翁而折之窻山毛晉識

數術記遺一卷

漢 徐 岳 撰

北周漢中郡守前司隸臣甄鸞註

明 毛 晉 校

余以天門金虎呼吸精泉

按星經云昴者西方白虎之宿太白者金之
精也太白入昴金虎相薄法有兵亂周宣王
時有人採薪於郊間歌曰金虎入門呼長精
吸玄泉時人莫能知其義老君曰太白入昴

一 婁衍言遺
兵其亂徐氏名岳東萊人蓋以漢室版蕩又
譎詭見於天將訪名山自求多福也

羽檄星馳郊多走馬

按漢徵天下兵必露檄插羽也老君曰天下
有道却走馬以糞天下無道戎馬生于郊也
遂負帙游山蹠跡志道

蹠跡者兩足共躡一足跡也漢文帝河上公
蹠跡爲士

備歷丘嶽林壑必過乃於太山見劉會稽博識

多聞徧於數術余因受業頗染所由余時問曰
數有窮乎會稽曰吾曾游天目山中
會稽官號漢中人也按曆志稱靈帝光和中
穀城守門候太山劉洪造乾象曆又制月行
遲疾陰陽曆自洪始也方於太初四分轉精
密矣洪後爲會稽太守劉洪付乾象於東萊
徐岳又授吳中書令闕澤澤甚重焉爲注解
今案地記天目山在吳興之界

見有隱者世莫知其名號曰天目先生余亦以

此意問之先生曰世人言三不能比兩乃云捐
悶與四維

藝經云捐悶者周公作也先本位以十二時
相從其文曰周有文章虎不如龍豕者何爲
來入兔宮王孫出卜乃造黃鍾犬就馬廐非
類相從羊奔蛇穴牛入雞籠徐援稱捐悶乃
是竒兩之術發首即竒一後乃竒兩者即爲
疑更調曰大豬東行遁虎坑兎子欲宿入馬
廐羊來入村狗所屯大牛何知乘龍上蛇往

西方入猴鄉雞鳥不止夜

其言三不能

比兩者孔子所造也布十干於其方戊巳在
西南維其文曰火爲木生甲呼丁夫婦義重
巳隨壬貴遺則統領辛參南丙妻則須守乙
後火戊子天癸就庚四維東萊子所造也布
十二時四維之一其文曰天行星紀石隨龍
淵風吹羊圈天門地連兎居蛇穴馬到猴邊
雞飛猪鄉鼠入虎廐摯亦有四維之戲與此
異焉

數不識三妄談知十

三者上中下也十數鼎一數也於先之意非止十等之名將關大衍之旨事一也

猶川人事迷其指歸乃恨司方之手爽

司方者指南車也狐疑論稱黃帝將見大隗於具茨之山至襄城之野川谷之山率多斜曲川人曰積數之常乃固以之非指南車之爲爽乃指謂擢司方所指者乃爲我等之西也然則指南豈其謬也乃行數里川人又

曰司方所指我等之東也衆共論之爲疑笑於時容成子怪而問之川人以其狀白對容成曰在此望之具茨之山於汝住所復在何方川人又曰在我之東容成曰汝向言在西今更在東何言不常也此非山川之移川曲之斜人心之惑耳川人乃請於斜曲之中定東西南北之術容成曰當豎一木爲表以索繫之表引索繞表畫地爲規日初出影長則出圓規之外向中影漸短入規之中候西北

隅影初入規之處則記之乃過中影漸長出規之外候東北隅影初出規之處又記之取二記之所即正東西也折半以指表則正南北也川人志之以爲知方之術

未識剎那之賒促安知麻姑之桑田

按楞伽經云稱量長短者積剎那數以成日夜剎那量者壯夫一彈指指過頃遙六十四剎那二百四剎那名一恒剎那三十恒剎那名一婆羅三十婆羅名一摩睺羅多三十摩

睺羅多子爲一日一夜其一日一夜有六百四十八萬剎那神仙傳稱麻姑謂王方平曰自接待以來見東海爲桑田向蓬萊水乃淺於往者略半也豈復將爲陵陸乎方平乃曰東海行復揚塵耳

不辨積微之爲量詎曉百億與大千

按楞伽經云積微成一阿耨七阿耨爲一銅上塵七銅上塵爲一水上塵七水上塵爲兔毫上塵七兔毫上塵爲一羊毛上塵七羊毛

上塵為一牛毛上塵七牛毛上塵為一嚮中
 由塵七嚮中由塵成一蟻七蟻成一蝨七蝨
 成一麥橫七麥橫成一指節二十四指節為
 一肘四肘為一弓去肘五百弓為阿蘭惹據
 若摩竭國人一拘盧舍為五里八拘盧舍為
 一由旬一由旬計之為四十里也及以算校
 之正得一十七里何者計二尺為一肘四肘
 為一弓弓長八尺也計五百弓有四千尺也
 八拘盧舍則有三萬二千尺除之得五千三

百三十三步以里法三百步除之得一十七
 里餘二百三十三步華嚴經云四天下共一
 日月為一世界有千世界有一小鐵圍山遶
 之名曰小千世界有一千小世界有中鐵圍
 山遶之名曰中千世界有中千世界有大鐵
 圍山遶之名曰大千世界此三千大千世界
 之中有百億須彌山乃今校之世有十億日
 月十億須彌山河者置小千世界之中有一
 千日月以一千乘之得一百萬即中千世界

中日月數也置中千世界日月之數以一千乘之得即大千世界日月之數也又云四天下者須彌山南曰閻浮提山北曰鬱丹越山東曰■提山西曰俱瞿耶尼山其日月一日一夜照四天下山南日中山北夜半山東日中山西夜半及以成事驗之則有疑矣何者按閻浮提人在須彌山南及至二月八月春秋分晝夜停以漏刻度之則晝夜各五十刻也然則日初出時東向視日之當我之東即

漏刻及其日浸當我之西五十刻其一日一夜之中遶三天下而來所以至曉亦得五十刻也胡以十萬爲億有百倍日月四天下等事有所未詳也

黃帝爲法數有十等及其用也乃有三焉十等者億兆京垓秭壤溝澗正載三等者謂上中下也其下數者十十變之若言十萬曰億十億曰兆十兆曰京也中數者萬萬變之若言萬萬曰億萬萬億曰兆萬萬兆曰京也上數者數窮則

變若言萬萬曰億億億曰兆兆兆曰京也

按詩云胡取禾三百億兮毛注曰萬萬曰億

此即中數也鄭注云十萬曰億此即下數也

徐接受記云億億曰兆兆兆曰京也此即上

數也鄭注以數為多故合而言之

從億至載終於大衍

按易經大衍之數五十其用四十有九又云

天一地二天三地四天五地六天七地八天

九地十天數五地數五天數二十有五地數

三十凡天地之數五十有五也

下數淺短計事則不盡上數宏廓世不可用故

其傳業惟以中數耳余時問曰先生之言上數

者數窮則變既云終於大衍大衍有限此何得

窮先生笑曰蓋未之思耳數之為用言重則變

以小兼大又加循環循環之理豈有窮乎

小兼大者備加董氏三等術數加更載為煩

故略焉

余又問曰為算之體皆以積為名為復更有他

法乎先生曰隸首注術乃有各種及余遺忘記
憶數事而已

其一積等 其一太乙 其一兩儀 其一三

才 其一五行 其一八卦 其一九宮 其

一運算 其一了知 其一成數 其一把頭

其一龜算 其一珠算 其一計算

此等諸法隨須更位唯有九宮守一不移位依
行色並應無窮

從積以來至珠算從一至於百千已上位更

不變改位依行色者位依五行之色北方水

色黑數一東方木色青數三南方火色赤數

二西方金色白數四中央土色黃數五言位

依行色 一位第一用玄珠十位第二用赤

珠百位第三用青珠千位第四用白珠萬位

第五用黃珠千萬位以白緹繫黃珠萬萬位

曰億以黃緹繫黃珠自餘諸位唯兼之故曰

並應無窮也

余慕其術慮恐遺忘故與好事後生記之云耳

積算

今之常算者也以竹爲之長四寸以效四時
方三分以象三才言算法是包括天地以燭
人情數始四時終於大衍猶如循環故曰今
之常算是也

太一算太一之行去來九道

刻板橫爲九道豎以爲柱柱上一珠數從下
始故曰去來九道也

兩儀算天氣下通地稟四時

刻板橫爲五道豎爲位一位兩珠色青下珠
色黃上珠其青珠自上而下第一刻主五第
二刻主六第三刻主七第四刻主八第五刻
主九其黃珠自下而上第一刻主一第二刻
主二第三刻主三第四刻主四而已故曰天
氣下通地稟四時也

三才算天地和同隨物變通

刻板橫爲三道上刻爲天中刻爲地下刻爲
人豎爲算位有之珠青珠屬天黃珠屬地白

珠屬人又其三珠通行三道若天珠在天爲
九在地主六在人主三其地珠在天爲八在
地主五在人主二人珠在天主七在地主四
在人主一故曰天地和同隨物變通亦况
三元上元甲子一七四中元甲子二八五下
元甲子三六九隨物變通也
五行算以生兼生生變無窮
五行之法水亥生數一火赤生數二木青生
數三金白生數四土黃生數五今爲五行算

色別九枚以五行色數相配爲算之位假令
九億八千七百六十五萬四千三百二十一
者則以白算配黃爲九億以青算配黃爲八
千以赤算配黃爲七百以玄算配黃算爲六
十以一黃算爲五萬以一白算爲四千以一
青算爲三百以一赤算爲二十以玄算爲一
也故曰以生兼生生變無窮
八卦算針刺八方位闕從天

算爲之法位用一針鋒所指以定算位數

從離起指正南離爲一西南坤爲二正西兌
爲三西北乾爲四正北坎爲五東北艮爲六
正東震爲七東南巽爲八至九位闕即在中
央豎而指天故曰位闕從天也

九宮算五行參數猶如循環

九宮者即二四爲肩六八爲足左三右七戴
九履一五居中央五行參數者設位之法依
五行已注於上是也

運籌算小往大來運於指掌

此法位別須算籌一枚各長五寸至一籌上
各爲五刻上頭一刻近一頭刻之其下四刻
迭相去一寸令去下頭亦一寸入手取四指
三間間有三節初食指上節間爲一位第二
節間爲十位第三節間爲百位至中指上節
間爲千位中節間爲萬位下節間爲十萬位
無名指上節間爲百萬位中爲千萬位下爲
億也它皆倣此至算刻近頭者一刻主五其
遠頭者一刻之別從下而起主一主二主三

主四若一二三四頭則向下於掌中中若具
五則迴取上頭向掌中故曰往大來也迴游
於手掌之間故曰運於指掌也
了知算首唯兼五腹背兩兼

了算之法一位爲一了字其了有三曲其下
股之末內主一外主九下次第一曲內主二
外主八當第二曲內主三外主七其第三曲
內主四外主六當了字之首則主五故曰首
唯兼五腹背兩兼也

成數算春夏生養秋收冬成

算之法位別須五色算一枚其一算之象頭
各以黃色爲本以生數也餘色爲首其五行
各配土爲成數也水玄生數一成數六火赤
生數二成數七木青生數三成數八金白生
數四成數九若以首向東及南爲生數向西
及北爲成數假令有九億八千七百六十五
萬四千三百二十一者則以白算首向北爲
九億以青算首向西爲八千以赤算首向北

妻律言遺
十三
爲七百以玄算首向西爲六十以黃算一枚
豎爲五萬以白算首向東爲四千以青算首
向南爲三百以赤算首向東爲二十以玄算
首向南爲一也故首向東向南爲生數向西
向北爲成數故云春夏生養秋收冬成也
把頭算以身當五目視四方

把頭之法別須算二枚一漫一齒者一面刻
爲一其一面爲二一面爲三其一面爲四也
漫者爲把爲猶即當五算生齒者爲把頭一

目當一算故曰以身當五目視四方也

龜算春夏秋成遇冬則停

爲算之法位別一龜龜之四面爲十二時以
龜首指寅爲一指卯爲二指辰爲三指巳爲
四指午爲五指未爲六指申爲七指酉爲八
指戌爲九指亥爲十龜頭指不以爲數故云
遇冬則停也

珠算控帶四時經緯三才

刻板爲三分其上下二分以停游珠中間一

分以定算位位各五珠上一珠與下四珠色
別其上別色之珠當其下四珠珠各當一至
下四珠所領故云控帶四時其珠游於三方
之中故云經緯三才也

計數既捨數術宜從心計

言捨數術者謂不用算籌宜以心計之或問
曰今有大水不知廣狹欲不用算籌度而知
之假令於水北度之者在水北置三表令南
北相直各相去一丈人在中表之北平直相

望北水岸令三相直即記南表相望相直之
處其中表人目望處亦記之又從中相望處
直望水南岸三相直看南表相直之處亦記
之取南表二記之處高下以等北表點記之
還從中表前望之所北望之北表下記三相
直之北即河北岸也又望上記三相直之處
即河北岸中間則水廣狹也或曰今有長竿
一枚不知高下既不用算籌云何計而知之
答曰取竿之影任其長短畫地記之假令手

中有三尺之物亦豎之取杖下之影長短以
量竿影得矣或問曰今有深坑在上看之可
知尺數已否答曰以一丈極意長短假令以
一丈之杖擲著坑中人在岸上手提之一杖
舒手望坑中之杖遙量知其寸數即令一人
於平地捉一丈之杖漸令却行以前者遙望
坑中寸量之與望坑中數等者即得或問曰
令甲乙各驅羊一羣人各問多少而甲曰更
得乙一口即加五多於甲問各幾何答曰甲

九口乙十一口或問曰甲乙各驅羊行人問
其多少甲曰我得乙一口即與乙等乙曰我
得甲乙口則倍多於甲問各幾何答曰甲二
乙四或問曰今有雞翁一隻直五文雞母一
隻直四文雞兒一文得四隻合有錢一百文
買雞大小一百隻問各幾何答曰雞翁十五
隻雞母一隻雞兒八十四隻合大小一百隻
計數多少略舉其例或問曰今有雞翁一隻
直四文雞母一隻直三文雞兒三隻直一文

合有錢一百文還買雞大小一百隻問各幾
何答曰雞翁八隻雞母十四隻雞兒七十八
隻合一百隻

或問鸞曰世人乃云算位者算子則豎信有之
乎鸞答之曰依如針算則以針鋒指八卦之位
一從離起左行周而至於巽八位既合及其至九
無位可指是在中豎而指天故曰有位合算
子豎之名也又問鸞曰昔有吳人趙達用一等
之法頭乘尾除其有此術乎鸞答之曰此乃傳

之失實猶公獲夔一足丁氏穿井而獲一人也
何者按乘之法重張其位以上呼一置得於中
置所除之數於下又置得於上亦三重張位然
則乘之與除法用不同欲以一算上下當六重
之身增損爲衆位之實若其神也則藉一算之
功如其凡也理不可爾問者又曰若如來指爲
妄矣此言何從而至鸞答之曰此亦傳之過實
也何者積一算者蓋一位用一算也頭乘尾除
者欲使乘別位乘時以針鋒指之除時則用針

尾擣之故有頭乘尾除之名也

算術記遺一卷 終

